

ZAKON

**O STEČAJU, PRINUDNOM PORAVNANJU I LIKVIDACIJI
U BRČKO DISTRIKTU BOSNE I HERCEGOVINE**

ZAKON O STEČAJU, PRINUDNOM PORAVNANJU I LIKVIDACIJI	3
I - OSNOVNE ODREDBE.....	3
II - OPŠTE ODREDBE.....	4
III - STEČAJNI POSTUPAK.....	5
Organi stečajnog postupka	5
Pokretanje stečajnog postupka.....	10
Otvaranje stečajnog postupka	12
Pravne posljedice otvaranja stečajnog postupka.....	14
Prenos ovlaštenja stečajnom upravniku.....	14
Radni odnos	14
Postavljanje stečajnog upravnika.....	15
Računi dužnika	15
Naziv dužnika	16
Izvršenja i osiguranja	16
Potraživanja povjerilaca	16
Kamata.....	17
Zastarijevanje potraživanja.....	17
Uslovna potraživanja.....	17
Prebijanje potraživanja.....	17
Dvostrano teretni ugovori zaključeni prije otvaranja stečajnog postupka	18
Nalozi i ponude.....	19
Prava na potragu stvari.....	19
Pobijanje pravnih radnji stečajnog dužnika	20
Razlučna i izlučna prava	21
Okončanje hitnih poslova.....	22
Nastavak poslovanja i tekući poslovi u toku stečaja.....	23
Prijavljivanje potraživanja	24
Ispitivanje prijavljenih potraživanja	25
Prodaja dužnika	27
Unovčavanje imovine dužnika	28
Namirenje povjerilaca	31
Zaključenje stečajnog postupka	33
Upis u registar	34
Prinudno poravnanje u stečaju	34
IV - SKRAĆENI STEČAJNI POSTUPAK.....	35
V - PRINUDNO PORAVNANJE.....	36
Pokretanje postupka prinudnog poravnanja	37
Otvaranje postupka prinudnog poravnanja	39
Plan finansijske reorganizacije.....	44
Ročište o prinudnom poravnanju.....	48
Odobrenje prinudnog poravnanja	49
Izvršenje prinudnog poravnanja.....	51
Stavljanje van snage prinudnog poravnanja.....	52
Upis u sudski registar	52
Troškovi prinudnog poravnanja	53
Primjena propisa o stečaju.....	53
VI - LIKVIDACIJA	53
VII - SUKOB ZAKONA I NADLEŽNOSTI.....	55
VIII - KAZNENE ODREDBE.....	56
IX - PRELAZNE I ZAVRŠNE ODREDBE	56

Na osnovu člana 23 Statuta Brčko Distrikta Bosne i Hercegovine, Skupština Brčko Distrikta Bosne i Hercegovine na 33. sjednici održanoj 11. i 14. decembra 2001. godine, usvaja:

**ZAKON
O STEČAJU, PRINUDNOM PORAVNANJU I LIKVIDACIJI
U BRČKO DISTRIKTU BOSNE I HERCEGOVINE**

I - OSNOVNE ODREDBE

Član 1

- (1) Ovim zakonom uređuju se uslovi za sprovođenje postupka stečaja, prinudnog poravnanja i likvidacije protiv dužnika određenog ovim zakonom.
- (2) U slučaju kada zakon određuje prestanak pravnog lica putem likvidacije i određuje nadležnost suda za sprovođenje postupka likvidacije ili ako ne određuje nadležnost, postupak sprovodi Osnovni sud Brčko Distrikta Bosne i Hercegovine (u daljem tekstu: "Sud").

Član 2

- (1) Stečajni postupak se sprovodi radi zajedničkog namirenja svih dužnikovih povjerilaca, unovčenjem njegove imovine i podjelom prikupljenih novčanih sredstava između povjerilaca.
- (2) U toku stečajnog postupka može se zaključiti prinudno poravnanje, kao i prodati dužnik kao pravno lice, radi uređivanja dužnikovog pravnog položaja i njegovih odnosa prema povjeriocima, a naročito radi održavanja njegovih poslovnih djelatnosti.

Član 3

- (1) Stečajni postupak se sprovodi protiv dužnika koji je trajnije nesposoban za plaćanje (nesolventan) ili mu predstoji nesposobnost plaćanja ili je prezadužen, kao i u drugim slučajevima određenim zakonom.
- (2) Smatra se da je dužnik trajnije nesposoban za plaćanje ako u razdoblju od šesdeset (60) dana nepekidno ne izmiruje sve svoje dospjele novčane obaveze.
- (3) Smatra se da predstoji nesposobnost za plaćanje, ako je vjerovatno da dužnik neće biti u mogućnosti da izmiri svoje obaveze u vrijeme dospelosti.
- (4) Smatra se da je dužnik prezadužen ako njegova imovina nije dovoljna da pokrije sve postojeće obaveze.
- (5) Stečajni postupak se neće sprovoditi u slučaju trajnije nesposobnosti za plaćanje ili prezaduženosti dužnika, ako se prema okolnostima slučaja (raspoloživim izvorima sredstava, vrsti imovine, pribavljenim osiguranjima i sl.) može osnovano pretpostaviti da će dužnik nastavkom poslovanja uredno ispunjavati svoje obaveze po dospeljeću.

Član 4

- (1) Stečajni postupak se ne može pokrenuti u slučaju kada dužnik ima samo jednog povjerioca.
- (2) Stečajni postupak se ne može pokrenuti protiv invalidskog preduzeća bez prethodnog odobranja Vlade Brčko Distrikta Bosne i Hercegovine (u daljem tekstu: Vlada).

Član 5

Stečajni postupak se može pokrenuti na prijedlog povjerioca, dužnika i lično odgovornog člana društva.

Član 6

- (1) U skladu sa ovim zakonom, dužnik može biti preduzeće ili drugo pravno lice ili preduzetnik čije se sjedište nalazi na teritoriji Brčko Distrikta Bosne i Hercegovine (u daljem tekstu: Distrikt), kao i drugo lice predviđeno zakonom.
- (2) Ako zakonom nije predviđena mogućnost sprovođenja stečajnog postupka na imovini određenog pravnog lica, za obaveze tog pravnog lica solidarno odgovaraju njegovi osnivači.

Član 7

- (1) Dužnik može pokrenuti postupak prinudnog poravnanja ako su ispunjeni uslovi za pokretanje stečajnog postupka ili predložiti prinudno poravnanje u toku stečajnog postupka.
- (2) Ako je prijedlog za pokretanje postupka prinudnog poravnanja podnjet prije prijedloga za pokretanje stečajnog postupka, stečajni postupak se neće pokretati prije okončanja postupka prinudnog poravnanja.

II - OPŠTE ODREDBE

Član 8

- (1) Stečajni postupak sprovodi Sud.
- (2) Stečajni postupak je hitan.
- (3) U stečajnom postupku se ne može tražiti povrat u pređašnje stanje, niti podnositi prijedlog za ponavljanje postupka, niti izjaviti revizija.

- (4) Lice koje propusti rok ili izostane sa ročišta na kojem su se trebali predati odnosno podnijeti prijedlozi, izjave ili prigovori, ne može ih kasnije predati odnosno podnijeti, ukoliko nije drugačije određeno ovim zakonom.

Član 9

- (1) Odluke u stečajnom postupku se donose u obliku rješenja ili zaključaka.
- (2) Zaključkom se izdaje nalog službenoj osobi ili organu koji sprovodi stečajni postupak za izvršenje radnji.
- (3) Prigovor protiv zaključka nije dozvoljen.

Član 10

- (1) Protiv rješenja se može podnijeti žalba, ako ovim zakonom nije drugačije određeno.
- (2) Rok za podnošenje žalbe je osam (8) dana, ako ovim zakonom nije drugačije određeno.
- (3) Rok za podnošenje žalbe teče od dana kada je rješenje istaknuto na oglasnoj tabli suda.
- (4) Ako je ovim zakonom propisano da se rješenja moraju dostaviti određenim licima, rok za podnošenje žalbe za ta lica teče od dana kada im je rješenje dostavljeno.
- (5) O žalbi protiv rješenja odlučuje Apelacioni sud Brčko Distrikta Bosne i Hercegovine (u daljem tekstu: "Apelacioni sud")
- (6) Žalba protiv rješenja ne zadržava njegovo izvršenje, ako ovim zakonom nije drugačije određeno.

Član 11

U stečajnom postupku shodno se primjenjuju odredbe Zakona o parničnom postupku, ako ovim zakonom nije drugačije određeno.

III - STEČAJNI POSTUPAK

Organi stečajnog postupka

Član 12

Organi stečajnog postupka su: stečajni sudija, stečajni upravnik i odbor povjerilaca.

Član 13

(1) Stečajni sudija:

1. odlučuje o otvaranju stečajnog postupka,
2. određuje neophodne poslove koje treba završiti u toku stečajnog postupka,
3. odobrava predračun troškova stečajnog postupka i određuje nagradu za rad stečajnog upravnika,
4. imenuje i razrješava stečajnog upravnika,
5. nadzire rad stečajnog upravnika,
6. daje obavezujuća uputstva stečajnom upravniku,
7. odobrava nacrt glavne diobe i donosi rješenje o glavnoj diobi stečajne mase,
8. donosi rješenje o zaključenju stečajnog postupka,
9. obavlja druge poslove određene ovim zakonom.

Član 14

- (1) Stečajni upravnik se imenuje rješenjem o otvaranju stečajnog postupka.
- (2) Protiv rješenja o imenovanju stečajnog upravnika može se uložiti žalba.
- (3) Po primanju dužnosti, stečajni upravnik daje izjavu pred stečajnim sudijom da će svoje dužnosti savjesno obavljati.

Član 15

- (1) Za stečajnog upravnika može se imenovati fizičko lice koje ima najmanje višu stručnu spremu pravne, ekonomske ili druge odgovarajuće struke i deset (10) godina radnog iskustva.
- (2) Za stečajnog upravnika ne može se imenovati lice koje bi moralo biti izuzeto kao sudija u stečajnom postupku, a naročito lice koje je blizak srodnik stečajnog sudije, lica odgovornog za obaveze u stečaju, člana uprave ili drugih organa dužnika i povjerioca, kao i lice koje je u odnosu suparništva s dužnikom.
- (3) Za stečajnog upravnika ne može biti imenovano lice koje po zakonu ne bi moglo biti imenovano za člana uprave dužnika, nadzornog odbora ili sličnog organa, niti lice koje je bilo zaposleno kod dužnika ili je bilo član nekog organa dužnika.

Član 16

- (1) Listu stečajnih upravnika određuje predsjednik Suda, po pribavljenom odobrenju Pravosudne komisije Brčko Distrikta Bosne i Hercegovine (u daljem tekstu: Pravosudna komisija). Ako to zahtijevaju posebne okolnosti, predsjednik Suda može, po odobrenju Pravosudne komisije, utvrditi novu listu stečajnih upravnika.
- (2) Pravosudna komisija je dužna odobrenje iz stava 1 ovog člana dostaviti Sudu u roku od trideset (30) dana od dana prijema zahtjeva predsjednika Suda.

- (3) Ako Pravosudna komisija ne postupi u skladu sa prethodnim stavom ovog člana listu stečajnih upravnika utvrdit će predsjednik suda nezavisno od toga.

Član 17

- (1) Stečajni upravnik ima prava i dužnosti uprave i vlasnika dužnika, u skladu sa potrebama stečajnog postupka, ako ovim zakonom nije drugačije određeno.
- (2) Stečajni upravnik obavlja poslove i vrši dužnost zastupnika dužnika.
- (3) Ako je dužnik preduzetnik, stečajni upravnik zastupa dužnika i obavlja samo one poslove koji se odnose na imovinu koja je uključena u stečajnu masu.

Član 18

- (1) Stečajni upravnik je naročito dužan:
1. dovesti u red knjigovodstvenu dokumentaciju do dana otvaranja stečajnog postupka,
 2. u roku od trideset (30) dana i uz saglasnost stečajnog sudije sastaviti plan toka stečajnog postupka, uključujući i predračun troškova i vremenski raspored,
 3. odrediti komisiju za popis imovine,
 4. sastaviti početni stečajni bilans,
 5. voditi poslovne knjige,
 6. sastavljati računovodstvene iskaze u skladu sa zakonom,
 7. postupati kao dobar privrednik u upravljanju poslovima stečajnog dužnika,
 8. brinuti da stečajni postupak teče brzo i bez neosnovanog odlaganja,
 9. brinuti o ostvarivanju potraživanja dužnika,
 10. unovčiti stvari dužnika koje ulaze u stečajnu masu,
 11. uz saglasnost stečajnog sudije sastaviti nacrt glavne diobe i nacrt završnog stečajnog bilansa,
 12. sastaviti nacrt naknadne diobe.
- (2) Stečajni upravnik odgovara svakom učesniku u stečajnom postupku za štetu koju nanese namjerno ili grubom nepažnjom. Stečajni upravnik ne odgovara za štetu nastalu zbog svoje radnje koju je odobrio stečajni sudija, niti zbog radnje izvršene u skladu sa uputstvima stečajnog sudije, osim ako je odobrenje ili uputstva dobio na prevaran način.

Član 19

Stečajni upravnik podnosi stečajnom sudiji tromjesečno ili na zahtjev stečajnog sudije ili odbora povjericilaca, pismene izvještaje o toku stečajnog postupka i o stanju stečajne mase.

Član 20

- (1) Stečajni sudija može na prijedlog odbora povjericilaca, zainteresovanog lica ili po službenoj dužnosti, razriješiti stečajnog upravnika ako ne obavlja svoje dužnosti ili iz drugih opravdanih razloga.

- (2) Stečajni upravnik ima pravo na žalbu protiv rješenja o razrješenju.
- (3) Stečajni upravnik može biti razriješen dužnosti i na svoj zahtjev.

Član 21

- (1) Stečajni upravnik ima pravo na naknadu opravdanih troškova i na nagradu za svoj rad.
- (2) Stečajni sudija može donijeti odluku o naknadi opravdanih troškova u toku stečajnog postupka, a može o tome odlučiti i nakon zaključenja stečajnog postupka. Stečajni sudija može stečajnom upravniku odobriti isplatu avansa nagrade za rad.

Član 22

- (1) Radi zaštite interesa povjerilaca u stečajnom postupku, stečajni sudija može osnovati odbor povjerilaca.
- (2) Na zahtjev povjerilaca čija potraživanja premašuju 50% od ukupnog iznosa potraživanja svih povjerilaca, stečajni sudija je dužan osnovati odbor povjerilaca, osim ako je vrijednost stečajne mase ispod 50.000 KM.

Član 23

- (1) Broj članova odbora povjerilaca određuje stečajni sudija i taj broj mora biti neparan.
- (2) Ako je broj povjerilaca manji od pet, svi povjerioci čine odbor povjerilaca.

Član 24

- (1) Članovi odbora povjerilaca se po pravilu biraju na prvom ročištu za utvrđivanje potraživanja.
- (2) Pravo na učešće u izboru članova odbora povjerilaca imaju povjerioci čija potraživanja su u cjelosti ili djelimično utvrđena, kao i povjerioci čija potraživanja su u cijelosti osporena, ali ih stečajni sudija smatra vjerovatnim.
- (3) Povjerilac čija utvrđena potraživanja premašuju jednu četvrtinu (1/4) ukupno utvrđenih potraživanja svih povjerilaca, može biti član odbora povjerilaca na svoj zahtjev i bez izbora.
- (4) Lice koje nije povjerilac, može zastupati člana odbora povjerilaca u radu odbora samo na osnovu posebnog ovlašćenja.
- (5) Članovi odbora povjerilaca većinom glasova svih članova biraju predsjednika odbora povjerilaca. Predsjednik odbora povjerilaca saziva i predsjedava odborom povjerilaca.

- (6) Stečajni sudija može po prethodnoj saglasnosti odbora povjerilaca, razriješiti člana odbora povjerilaca, ako se utvrdi da zanemaruje svoje obaveze i izabрати drugog člana. Stečajni sudija mora obrazložiti odluku o razrješenju člana odbora povjerilaca i pismeno obavijestiti sve povjerioce. Razriješeni član odbora povjerilaca ima pravo na žalbu protiv odluke o razrješenju.
- (7) Odbor povjerilaca mora izjavu o saglasnosti, odnosno nesaglasnosti iz stava 6 ovog člana dostaviti stečajnom sudiji u roku od osam (8) dana od prijema poziva stečajnog sudije. Ako se odbor povjerilaca ne izjasni u ovom roku, smatra se da postoji saglasnost za razrješenje člana odbora povjerilaca.

Član 25

- (1) Odbor povjerilaca o pitanjima iz svog djelokruga odlučuje na sjednicama koje saziva predsjednik odbora povjerilaca na prijedlog stečajnog sudije, stečajnog upravnika ili većine članova odbora povjerilaca.
- (2) Ako predsjednik odbora povjerilaca ne sazove sjednicu na prijedlog lica iz stava 1 ovog člana, sjednicu odbora povjerilaca saziva stečajni sudija.
- (3) Sjednicama odbora povjerilaca prisustvuju stečajni sudija i stečajni upravnik, ali bez prava glasa.
- (4) Odbor povjerilaca odlučuje većinom glasova prisutnih članova, a ako su glasovi podijeljeni, odlučuje stečajni sudija.

Član 26

- (1) Odbor povjerilaca:
 1. razmatra izvještaje stečajnog upravnika o toku stečajnog postupka i o stanju stečajne mase,
 2. ima pravo da pregleda poslovne knjige i cjelokupnu dokumentaciju koju je preuzeo stečajni upravnik,
 3. ima pravo na podnošenje prigovora stečajnom sudiji na rad stečajnog upravnika,
 4. predlaže smjenu i imenovanje novog stečajnog upravnika,
 5. daje mišljenje stečajnom sudiji o unovčenju imovine dužnika,
 6. daje mišljenje stečajnom sudiji o nastavljanju započelih i zaključivanju novih poslova,
 7. daje mišljenje stečajnom sudiji o priznavanju opravdanih manjkova utvrđenih popisom imovine,
 8. obavlja druge poslove predviđene ovim zakonom.

- (2) Odbor povjericilaca mora, na zahtjev povjericilaca, da ih obavještava o toku stečajnog postupka i o stanju stečajne mase.
- (3) Članovi odbora povjericilaca odgovorni su svim povjeriocima u stečajnom postupku, za štetu prouzrokovanu namerno ili grubom napažnjom u izvršavanju svojih funkcija.

Član 27

- (1) Stečajni sudija donosi odluku o naknadi neophodnih troškova članovima odbora povjericilaca.
- (2) Naknada troškova iz stava 1 ovog člana je uključena u troškove stečajnog postupka.

Pokretanje stečajnog postupka

Član 28

- (1) Stečajni postupak se pokreće podnošenjem prijedloga u pismenoj formi.
- (2) Prijedlog može podnijeti dužnik, povjericilac i lično odgovoran član društva.
- (3) Povjericilac može podnijeti prijedlog za otvaranje stečajnog postupka ako izvršnom ispravom dokaže ili vjerodostojnom ili drugom ispravom učini vjerovatnim, postojanje potraživanja.

Član 29

Podnosilac prijedloga mora učiniti vjerovatnim postojanje uslova za otvaranje stečajnog postupka iz člana 3 ovog zakona.

Član 30

- (1) Ako prijedlog podnosi povjericilac, stečajni sudija će dostaviti kopiju prijedloga dužniku koji u roku od petnaest (15) dana mora odgovoriti na prijedlog.
- (2) Ako se dužnik iz stava 1 ovog člana saglasi sa prijedlogom ili se o njemu ne izjasni, smatraće se da postoje uslovi za otvaranje stečajnog postupka.
- (3) Ako se u roku iz stava 1 ovog člana dužnik izjasni da ne postoje uslovi za otvaranje stečajnog postupka, stečajni sudija će prikupiti podatke za ocjenu da li ti uslovi postoje (npr. uvidom u podatke banke koja obavlja platne transakcije za dužnika, angažovanjem sudskog vještaka ili na neki drugi odgovarajući način).

Član 31

- (1) Predlagač je dužan položiti avans kojeg odredi stečajni sudija za pokrivanje troškova pokretanja stečajnog postupka.

- (2) Ako predlagač ne položi određeni avans, stečajni sudija odbacuje prijedlog. U izuzetnim slučajevima stečajni sudija može odlučiti da nastavi postupak iako avans nije položen.
- (3) Ako prijedlog podnese Poreska uprava Brčko Distrikta, troškovi stečajnog postupka privremeno se predujmljuju iz sredstava Suda.
- (4) Ako stečajni postupak bude otvoren, iznos avansa za pokrivanje troškova otvaranja stečajnog postupka biće uključen u troškove stečajnog postupka.

Član 32

- (1) Prijedlog za otvaranje stečajnog postupka se može povući do trenutka kada obavještenje o otvaranju stečajnog postupka bude istaknuto na oglasnoj tabli suda.
- (2) Ukoliko predlagač povuče prijedlog za otvaranje stečajnog postupka, stečajni sudija će obustaviti postupak.
- (3) Ako se prije otvaranja stečajnog postupka utvrdi da je dužnik postao sposoban za plaćanje, stečajni sudija će odbaciti prijedlog za otvaranje stečajnog postupka.

Član 33

- (1) Nakon podnošenja prijedloga za otvaranje stečajnog postupka, na prijedlog povjerioca koji učini vjerovatnim svoje potraživanje, stečajni sudija može rješenjem o privremenoj mjeri:
 1. ograničiti prava licima koja su ovlašćena da obavljaju pravne poslove dužnika,
 2. zabraniti isplate sa dužnikovog računa, izuzev isplate osnovnih plata, određenih kolektivnim ugovorom,
 3. zabraniti raspolaganje imovinom dužnika ili odrediti da dužnik može raspolagati svojom imovinom samo uz prethodnu saglasnost stečajnog sudije,
 4. odrediti drugu neophodnu mjeru kojom bi se spriječila promjena imovinskog stanja dužnika.
- (2) Stečajni sudija određuje da se ograničenja iz tačaka 1 i 3 prethodnog stava unesu u sudski registar, a da se o ograničenjima iz tačke 2 prethodnog stava obavijesti finansijska organizacija koja obavlja platne transakcije za dužnika.
- (3) U izuzetnim slučajevima, privremenu mjeru iz stava 1 ovog člana, stečajni sudija može donijeti po službenoj dužnosti.

Član 34

- (1) Dužnik protiv kojeg je podniet prijedlog za otvaranje stečajnog postupka, dužan je stečajnom sudiji staviti na raspolaganje svu potrebnu dokumentaciju, podatke i obavještenja.

- (2) Vlasnici dužnika, član organa upravljanja dužnika, direktor i drugi dužnikovi zaposlenici (bez obzira da li im je funkcija ili radni odnos kod dužnika prestao), dužni su stečajnom sudiji staviti na raspolaganje svu potrebnu dokumentaciju, podatke i obavještenja.
- (3) Sa obavezom iz stava 1 i stava 2 ovog člana da se pruže informacije i predaju dokumenta, postupaće se u skladu sa propisima o obavezi svjedočenja.

Otvaranje stečajnog postupka

Član 35

- (1) Kada prikupi informacije iz stava 3, člana 30 ovog zakona, stečajni sudija zakazuje ročište radi raspravljanja o postojanju uslova za otvaranje stečajnog postupka, na koje poziva predlagачa, dužnika i, po potrebi, vještake i svjedoke.
- (2) Na ovom ročištu ili najkasnije tri (3) dana nakon ročišta, stečajni sudija donosi rješenje o otvaranju stečajnog postupka protiv dužnika ili rješenje o odbacivanju prijedloga za otvaranje stečajnog postupka.
- (3) U rješenju o odbacivanju prijedloga za otvaranje stečajnog postupka, stečajni sudija određuje ko snosi nastale troškove.
- (4) Stečajni sudija donosi rješenje o otvaranju stečajnog postupka bez održanog ročišta, ako je otvaranje stečajnog postupka predložio dužnik ili u slučaju iz stava 2, člana 30 ovog zakona.
- (5) Pored lica koja su ovlašćena da zastupaju dužnika, žalbu protiv rješenja o otvaranju stečajnog postupka može podnijeti i vlasnik dužnika.
- (6) Žalba iz stava 5 ovog člana ne sprečava izvršenje rješenja o otvaranju stečajnog postupka.

Član 36

Stečajni postupak počinje bez ispitivanja uslova za stečaj ako prijedlog za otvaranje stečajnog postupka podnese likvidacioni upravnik ili u slučaju iz člana 129 stav 2 i člana 159 ovog zakona.

Član 37

- (1) Ako utvrdi da imovina koja bi ušla u stečajnu masu nije dovoljna da pokrije troškove stečajnog postupka ili da je neznatne vrijednosti, stečajni sudija donosi rješenje o otvaranju i zaključenju stečajnog postupka.
- (2) Ako u toku stečajnog postupka, stečajni sudija utvrdi da imovina koja bi ušla u stečajnu masu nije dovoljna da pokrije troškove tog postupka ili da je neznatne vrijednosti, donijeće rješenje o zaključenju stečajnog postupka.

- (3) Rješenje iz stavova 1 i 2 ovog člana objavljuje se u “Službenom glasniku Brčko Distrikta Bosne i Hercegovine” i “Službenom glasniku Bosne i Hercegovine”.
- (4) Protiv rješenja iz stavova 1 i 2 ovog člana povjerioci mogu podnijeti žalbu u roku od petnaest dana (15) od dana objavljivanja rješenja u “Službenom glasniku Brčko Distrikta Bosne i Hercegovine” i “Službenom glasniku Bosne i Hercegovine”.
- (5) Imovina će se upotrijebiti za podmirenje troškova stečajnog postupka, a neiskorišćeni dio će se predati razvojnoj agenciji Distrikta koju odredi Vlada.

Član 38

- (1) U slučaju da postoji samo jedan povjerilac ili da imovina dužnika nije dovoljna da pokrije troškove stečajnog postupka, stečajni sudija može odlučiti da se stečajni postupak otvori, ako povjerilac učini vjerovatnim da će na osnovu pobijanja pravnih radnji dužnika, imovina biti vraćena u stečajnu masu.
- (2) Stečajni sudija može odrediti obavezu povjeriocu da položi avans koji odredi stečajni sudija radi pokrivanja troškova sprovođenja postupka. Povjerilac ima pravo na naknadu za avans u skladu sa propisima o troškovima stečajnog postupka.

Član 39

- (1) O otvaranju stečajnog postupka povjerioci se obavještavaju oglasom.
- (2) Oglas se ističe na oglasnoj tabli suda i objavljuje u “Službenom glasniku Brčko Distrikta Bosne i Hercegovine” i “Službenom glasniku Bosne i Hercegovine”. Oglas se mora istaći na oglasnoj tabli suda istog dana kada je doneseno rješenje o otvaranju stečajnog postupka.
- (3) Rješenje o otvaranju stečajnog postupka dostavlja se predlagачu i dužniku.

Član 40

Oglas o otvaranju stečajnog postupka sadrži:

1. naziv suda,
2. izvod iz rješenja o otvaranju stečajnog postupka,
3. naziv i adresu dužnika,
4. ime, prezime i adresu stečajnog upravnika,
5. poziv svim povjeriocima da prijave svoja potraživanja stečajnom sudiji u dva primjerka sa dokazima, u roku od šezdeset (60) dana od dana objavljivanja oglasa o otvaranju stečajnog postupka u “Službenom glasniku Brčko Distrikta Bosne i Hercegovine” i “Službenom glasniku Bosne i Hercegovine”,
6. mjesto, dan i sat ročišta za ispitivanje potraživanja,
7. poziv dužnicima da bez odlaganja izmire svoja dugovanja,
8. dan isticanja oglasa na oglasnoj tabli suda.

Pravne posljedice otvaranja stečajnog postupka

Član 41

- (1) Pravne posljedice otvaranja stečajnog postupka nastupaju na dan kada je oglas o otvaranju stečajnog postupka istaknut na oglasnoj tabli suda.
- (2) Ako je rješenje o otvaranju stečajnog postupka ukinuto po žalbi, a stečajni postupak nakon ukidanja rješenja ponovo otvoren, pravne posljedice stečajnog postupka nastupaju na dan kada je na oglasnoj tabli suda istaknuto prvo rješenje.

Član 42

- (1) Stečajna masa se formira na dan otvaranja stečajnog postupka.
- (2) Cjelokupna imovina dužnika u vrijeme otvaranja stečajnog postupka, te imovina koju dužnik primi do okončanja stečajnog postupka, čini stečajnu masu dužnika.
- (3) U slučaju kada je stečajni postupak otvoren protiv društva sa neograničenom odgovornošću i komanditnog društva, sva imovina lično odgovornog člana uključuje se u stečajnu masu, a izuzetak čine stvari i prihodi koji su oslobođeni izvršenja u skladu sa Zakonom o izvršnom postupku.
- (4) U stečajnu masu dužnika, koji je preduzetnik, uključuje se sva imovina koja pripada dužniku nakon otvaranja stečajnog postupka, osim stvari i prihoda iz stava 3 ovog člana.
- (5) U slučajevima iz stavova 3 i 4 ovog člana, povjerilac može predložiti izdavanje privremene mjere u smislu člana 33 ovog zakona.

Prenos ovlašćenja stečajnom upravniku

Član 43

- 1) Na dan otvaranja stečajnog postupka, ovlašćenja uprave, zastupnika i drugih organa dužnika prenose se na stečajnog upravnika.
- 2) Ako se u stečajnom postupku radi o dužniku – preduzetniku, ovlašćenja iz stava 1 ovog člana prenose se na stečajnog upravnika sa ograničenjima iz člana 17 stav 3 ovog zakona.

Radni odnos

Član 44

- (1) Radni odnos zaposlenih kod dužnika prestaje danom otvaranja stečajnog postupka.

- (2) Stečajni upravnik mora obavijestiti nadležni organ za zapošljavanje o prestanku radnog odnosa zaposlenih kod dužnika, kako bi zaposleni mogli ostvarivati svoja prava.

Član 45

- (1) U cilju izvršavanja zadataka iz člana 18, stav 1 ovog zakona, a uz saglasnost stečajnog sudije, stečajni upravnik može izuzetno u pojedinačnim slučajevima sa potrebnim brojem zaposlenih zaključiti ugovor o djelu i ugovor o radu na određeno vrijeme, u skladu sa propisima o radnim odnosima, i može ovlastiti lica da zastupaju dužnika u sudskim i upravnim postupcima.
- (2) Troškovi iz stava 1 ovog člana uračunavaju se u troškove stečajnog postupka.

Postavljanje stečajnog upravnika

Član 46

- (1) Po otvaranju stečajnog postupka vrši se, u najkraćem roku, uvođenje u dužnost stečajnog upravnika.
- (2) Poslije uvođenja u dužnost, stečajni upravnik je dužan da ažurira knjigovodstvenu dokumentaciju do otvaranja stečajnog postupka i da izradi početni stečajni obračun na osnovu inventarisanja stanja na dan otvaranja stečajnog postupka.
- (3) Ako se prilikom izrade početnog stečajnog obračuna ustanovi da je stvarna vrijednost dužnikove imovine manja od knjigovodstvene vrijednosti, stečajni sudija će na prijedlog stečajnog upravnika izdati rješenje o otpisu razlike vrijednosti na dan pokretanja stečajnog postupka.
- (4) Ako postoji odbor povjericilaca, obavezno je pribavljanje njegovog mišljenja o otpisima iz stava 3 ovog člana.

Računi dužnika

Član 47

- (1) Danom otvaranja stečajnog postupka gase se računi dužnika, a prestaju prava lica koja su bila ovlaštena da raspoložu imovinom dužnika.
- (2) Banka koja za dužnika obavlja platne transakcije, dužna je da po zahtjevu stečajnog upravnika otvori novi račun preko kojeg će se obavljati transakcije dužnika.
- (3) Sredstva sa ugašenog dužnikovog računa prenose se na novootvoreni račun.
- (4) Stečajni upravnik je dužan da o pokretanju stečajnog postupka bez odlaganja obavijesti banku koja za dužnika obavlja platne transakcije. Od momenta prijema ovog obavještenja, banka ne može vršiti isplatu sa dužnikovog računa.

Naziv dužnika

Član 48

Uz naziv dužnika dodaju se riječi “u stečaju” sa naznačenjem novog broja računa preko kojeg se vrše transakcije dužnika.

Izvršenja i osiguranja

Član 49

- (1) Danom otvaranja stečajnog postupka ne može se protiv dužnika dopustiti mjera obezbjeđenja niti prinudnog izvršenja radi namirenja potraživanja u pogledu kojih postoji izvršna ili vjerodostojna isprava.
- (2) Postupci obezbjeđenja i izvršenja iz stava 1 ovog člana koji su u toku, prekidaju se.
- (3) Upisi u javne knjige mogu biti dozvoljeni i izvršeni poslije dana otvaranja stečajnog postupka, ako su uslovi za upis ispunjeni a prijedlog za upis podnesen, prije dana otvaranja stečajnog postupka.
- (4) Stav 1 ovog člana se neće primjenjivati za pravosnažne izvršne isprave koje se odnose na troškove stečajnog postupka, i neće se primjenjivati na obaveze plaćanja takse za radnje dužnika u toku postupka.

Potraživanja povjerilaca

Član 50

- (1) Na dan otvaranja stečajnog postupka nedospjela novčana i nenovčana potraživanja povjerilaca prema dužniku smatraju se dospjelim.
- (2) Nenovčana potraživanja povjerilaca prema dužniku postaju novčana potraživanja u skladu sa cijenama na dan otvaranja stečajnog postupka.
- (3) Novčana i nenovčana potraživanja povjerilaca prema dužniku, koja se odnose na povremena davanja pretvaraju se u jednokratna novčana potraživanja.
- (4) Povjeriočeva potraživanja u stranoj valuti postaju potraživanja u domaćoj valuti utvrđena prema srednjem kursu Centralne banke Bosne i Hercegovine na dan otvaranja stečajnog postupka.

Član 51

Nedospjela novčana potraživanja na koja se ne računa kamata, snižavaju se (oduzimaju) za iznos kamate u skladu sa kamatnom stopom propisanom Zakonom o visini stope zatezne kamate (u daljem tekstu: "zakonska kamata"), za period od dana otvaranja stečajnog postupka do dana dospijeca potraživanja. Na potraživanja koja su na ovaj način snižena, teče zakonska kamata od dana otvaranja stečajnog postupka do isplate.

Kamata

Član 52

- (1) Danom otvaranja stečajnog postupka ne prestaje teći kamata na potraživanja od dužnika.
- (2) Na potraživanja iz člana 50 ovog zakona, teče zakonska kamata počev od dana otvaranja stečajnog postupka.

Zastarijevanje potraživanja

Član 53

- (1) Prijavlivanjem potraživanja u stečajnu masu prekida se zastarijevanje potraživanja od dužnika.
- (2) Zastarijevanje potraživanja dužnika prema njegovima dužnicima ne teče jednu (1) godinu od dana otvaranja stečajnog postupka.

Uslovna potraživanja

Član 54

- (1) Povjeriocu čije je potraživanje vezano za odložni uslov ili raskidni uslov osiguravaju se odgovarajuća sredstva iz stečajne mase.
- (2) Ako odložni uslov ne nastupi do konačne diobe stečajne mase, takvo potraživanje se gasi, a osigurana sredstva raspoređuju se na ostale povjerioce.
- (3) Ako raskidni uslov ne nastupi do konačne diobe stečajne mase, uslov se računa kao neprijavljen.

Prebijanje potraživanja

Član 55

- (1) U stečajnom postupku dopušteno je prebijanje potraživanja povjerioca sa protivpotraživanjem dužnika.

- (2) Potraživanja koja se mogu prebiti do otvaranja stečajnog postupka smatraće se prebijenim i neće biti prijavljena u stečajnu masu.
- (3) Prebijaju se i potraživanja, odnosno protivpotraživanja koja nisu dospjela na dan otvaranja stečajnog postupka, kao i potraživanja, odnosno protivpotraživanja koja ne glase na novčani iznos.
- (4) Prebiti se mogu i uslovna potraživanja ako to odobri stečajni sudija. Stečajni sudija može prebijanje ovih potraživanja usloviti polaganjem osiguranja od strane povjerioca.
- (5) Povjerioci čija se potraživanja prebijaju dužni su da o prebijanju obavijeste stečajnog upravnika. Povjerilac koji ne obavijesti stečajnog upravnika odgovoran je za štetu i troškove.

Član 56

- 1) Prebijanje nije dozvoljeno ako je potraživanje ustupljeno povjeriocu za posljednjih šest (6) mjeseci prije dana otvaranja stečajnog postupka, a povjerilac je znao ili je mogao znati da je dužnik postao nesposoban za plaćanje ili da je protiv njega podnesen prijedlog za otvaranje stečajnog postupka ili postupka prinudnog poravnanja.
- 2) Izuzetno, prebijanje potraživanja dopušteno je ako su u pitanju potraživanja u vezi sa izvršenjem neizvršenih ugovora ili potraživanja koja su oživjela pobijanjem pravnog posla dužnika.

Član 57

Potraživanja povjerilaca koja su nastala prije dana otvaranja stečajnog postupka ne mogu se prebiti s protivpotraživanjem stečajnog dužnika koje je nastalo poslije otvaranja stečajnog postupka.

Dvostrano teretni ugovori zaključeni prije otvaranja stečajnog postupka

Član 58

Otvaranje stečajnog postupka nema pravnih posljedica na potraživanja stečajnog povjerioca koja proizilaze iz dvostrano teretnog ugovora ako ni stečajni dužnik ni stečajni povjerilac nisu ispunili svoje ugovorne obaveze, ili nisu ispunili obaveze iz ugovora u potpunosti.

Član 59

- (1) Ako u periodu do otvaranja stečajnog postupka, ni stečajni dužnik ni druga strana u dvostrano teretnom ugovoru nije ispunila ugovorne obaveze, ili ih nije u potpunosti ispunila, stečajni upravnik može izvršiti ugovor i zahtijevati ispunjenje ugovornih obaveza od druge strane ili odustati od ugovora. Stečajni upravnik može odustati od ugovora u roku od tri (3) mjeseca od otvaranja stečajnog postupka.

- (2) Druga ugovorna strana može prije isteka vremena iz stava 1 ovog člana, tražiti da se stečajni upravnik izjasni u odgovarajućem roku da li ugovor održava na snazi ili odustaje od ugovora. Ako se stečajni upravnik ne izjasni, smatraće se da je odustao od ugovora.
- (3) Ako stečajni upravnik odustane od ugovora, druga ugovorna strana može tražiti naknadu štete kao stečajni povjerilac.
- (4) Ako je druga ugovorna strana dužna prva ispuniti ugovor, onda ona može odbiti da to učini sve dok dužnik ne pruži osiguranje.
- (5) Druga ugovorna strana ne može tražiti izvršenje fiksnih ugovora ako je rok isporuke poslije dana otvaranja stečajnog postupka, ali može tražiti naknadu štete kao stečajni povjerilac.
- (6) Iznos naknade štete u smislu stava 5 ovog člana, jednak je razlici između ugovorene kupoprodajne cijene robe i srednje tržišne cijene koju bi takva roba imala na dan koji je ugovorom određen kao dan isporuke robe u mjestu ispunjenja ugovora.

Član 60

- (1) Ugovore o zakupu stečajni upravnik može otkazati nezavisno od zakonskih ili ugovornih rokova i to svakog prvog dana u mjesecu s otkaznim rokom od trideset (30) dana.
- (2) Otkaz ugovora o zakupu u skladu sa stavom 1 ovog člana ne utiče na pravo druge ugovorne strane na naknadu štete, u svojstvu stečajnog povjerioca.

Nalozi i ponude

Član 61

- (1) Izdati ili primljeni nalog dužnika prestaje da važi danom otvaranja stečajnog postupka.
- (2) Ponude učinjene dužniku ili ponude koje je dužnik učinio prestaju važiti danom otvaranja stečajnog postupka, ako do dana otvaranja postupka nisu prihvaćene.

Prava na potragu stvari

Član 62

- (1) Prodavac kome kupovna cijena nije isplaćena u cijelosti, može tražiti da mu se vrati roba koja je iz drugog mjesta poslata dužniku prije dana otvaranja stečajnog postupka, a do dana otvaranja tog postupka nije prispjela na odredište, odnosno ako je do tog dana dužnik nije preuzeo (u daljem tekstu: pravo na potragu).
- (2) Pravo na potragu ima i komisionar za kupovinu robe.
- (3) Ako je dužnik preuzeo samo na čuvanje robu koja je stigla na odredište prije dana otvaranja stečajnog postupka, prodavac nema pravo na potragu, ali ima pravo da redovnim putem ostvari svoja prava u pogledu te robe kao izlučni povjerilac.

Pobijanje pravnih radnji stečajnog dužnika

Član 63

- (1) Povjerioci i stečajni upravnik imaju pravo pobijati pravne radnje koje je dužnik preduzeo u posljednjoj godini prije dana otvaranja stečajnog postupka, ako se tim radnjama remeti ravnomjerno namirenje povjerilaca (oštećenje povjerilaca), odnosno kojima se pojedini povjerioci stavljaju u povoljniji položaj (pogodovanje povjerioca) i ako je druga strana prema kojoj su te radnje preduzete znala, ili je trebala biti upoznata, za nesposobnost dužnika za plaćanje.
- (2) Smatraće se da je povjerilac u čiju korist je preduzeta pravna radnja iz stava 1 ovog člana znao ili je trebao biti upoznat sa nesposobnošću dužnika za plaćanje:
 1. ako je povjerilac naplatio svoje potraživanje koje nije dospjelo ili je to učinio u obliku i na način koji nije uobičajen;
 2. ako je pravna radnja koja je predmet pobijanja učinjena u periodu od tri (3) mjeseca prije podnošenja prijedloga za otvaranje stečajnog postupka.

Član 64

- (1) Povjerioci i stečajni upravnik imaju pravo pobijati pravne radnje preduzete od strane dužnika u periodu od jedne (1) godine prije dana otvaranja stečajnog postupka ako je osoba u čiju korist je radnja preduzeta dobila na osnovu pobijane pravne radnje imovinu dužnika bez naknade ili uz neznatnu naknadu.
- (2) Pravna radnja iz stava 1 ovog člana odnosi se i na propust da se izvrši radnja, a posljedice tog nevršenja su da je dužnik izgubio određena materijalna prava ili su mu nametnute određene materijalne obaveze.

Član 65

Ne mogu se pobijati:

1. pravne radnje iz člana 125 ovog zakona koje je dužnik izvršio u okviru tekućeg poslovanja i transakcije izvršene sa dopustom upravnika u prinudnom poravnanju;
2. pravne radnje koje je dužnik preduzeo kako bi izvršio zaključeno prinudno poravnanje;
3. pravne radnje iz tekućeg poslovanja koje je dužnik izvršio nakon zaključenog prinudnog poravnanja, sa izuzetkom pravnih radnji koje bi mogle štetiti povjeriocima;
4. isplate po mjenicama i čekovima ako je druga strana morala primiti isplatu da ne bi izgubila pravo na regres protiv ostalih mjeničnih, odnosno čekovnih obveznika.

Član 66

- (1) Mogu se pobijati i pravne radnje iz članova 63 i 64 ovog zakona za koje već postoji izvršno sudsko rješenje ili koje su preduzete u postupku izvršenja.

- (2) Ako zahtjev za pobijanje pravnih radnji bude usvojen, prestaje djelovanje izvršne isprave prema stečajnoj masi.

Član 67

- (1) Tužba za pobijanje pravnih radnji može se podnijeti u roku od šest (6) mjeseci od dana otvaranja stečajnog postupka a najkasnije do diobne rasprave, ako se diobna rasprava održava u periodu od jedne godine od dana otvaranja stečajnog postupka.
- (2) Tužba iz stava 1 ovog člana podnosi se protiv osobe u čiju korist je pobijana radnja preduzeta, njegovih nasljednika i pravnih sljedbenika imovine iz člana 63 i 64 ovoga zakona, kao i protiv dužnika ako on nije tužilac.
- (3) Tužba protiv pravnih sljedbenika se može podnijeti:
1. ako je pravni sljedbenik u vrijeme sticanja imovine imao saznanja o okolnostima koje opravdavaju pobijanje sticanja imovine u korist pravnog prethodnika,
 2. ako je pravni sljedbenik stekao imovinu bez naknade ili uz neznatnu naknadu.
- (4) Stečajni upravnik može podnijeti tužbu za pobijanje pravnih radnji samo po odobrenju stečajnog sudijske.
- (5) Povjerioci i stečajni upravnik mogu pobijati pravne radnje iz članova 63 i 64 ovog zakona, istaknuvši prigovore u parnici ili upravnom postupku bez vremenskog ograničenja iz stava 1 ovog člana.

Član 68

- (1) Ako zahtjev za pobijanje pravne radnje bude usvojen, pobijana pravna radnja je bez pravnog djelovanja prema stečajnoj masi.
- (2) U slučaju iz stava 1 ovog člana, osoba u čiju je korist pravna radnja preduzeta dužna je vratiti u stečajnu masu svu imovinsku korist stečenu nakon preduzimanja pobijane radnje, u skladu sa opštim propisima o povratu stvari koje su nezakonito stečene.
- (3)

Razlučna i izlučna prava

Član 69

- (1) Otvaranje stečajnog postupka ne utiče na prava odvojenog namirenja iz određenih stvari dužnika (založno pravo, pravo namirenja, pravo retencije i druga razlučna prava) kao i na prava izdvajanja stvari koja ne pripadaju dužniku (izlučna prava).

- (2) Razlučna prava stečena izvršenjem ili osiguranjem za posljednjih šezdeset (60) dana prije dana otvaranja stečajnog postupka prestaju važiti.
- (3) Razlučna prava ostaju na snazi ako se stečajni postupak ne sprovodi zbog razloga navedenih u članu 37 ovog zakona.
- (4) Ako je razlučno pravo koje je stečeno izvršenjem ostalo na snazi u smislu stavova 1 i 3 ovog člana, izvršenje se nastavlja na osnovu rješenja stečajnog sudije iz člana 81 stav 4 ovog zakona.

Član 70

- (1) Ako dio imovine dužnika na kojem je stečeno razlučno pravo (posebna stečajna masa) nije dovoljan da se iz njega namiri potraživanje razlučnog povjerioca u cjelini, razlučni povjerilac ima pravo da nenamireni dio svog potraživanja ostvari kao stečajni povjerilac.
- (2) Višak koji ostane po namirenju potraživanja razlučnog povjerioca iz posebne stečajne mase unosi se u diobnu masu.

Okončanje hitnih poslova

Član 71

- (1) U toku stečajnog postupka okončaće se samo oni započeti poslovi čije je izvršenje neophodno da bi se povećala stečajna masa, odnosno da bi se spriječilo smanjivanje stečajne mase, ukoliko se realizacija stečajne mase neće odgoditi okončanjem ovih poslova.
- (2) Stečajni sudija će na prijedlog stečajnog upravnika i na osnovu pribavljenog mišljenja odbora povjerilaca, ako je osnovan, odlučiti koji se poslovi smatraju neophodnim u smislu stava 1 ovog člana.

Član 72

U toku stečajnog postupka, uz saglasnost stečajnog sudije, novi ugovori mogu biti zaključeni samo u cilju unovčenja imovine dužnika i radi okončanja započelih poslova i poslova neophodnih da bi se spriječilo nastupanje štete na imovini dužnika.

Nastavak poslovanja i tekući poslovi u toku stečaja

Član 73

- (1) Pored odredbi članova 71 i 74 ovog zakona, nakon otvaranja stečajnog postupka stečajni dužnik može nastaviti poslovanje i vršenje ostalih tekućih poslova pod sljedećim uslovima:
 1. ako stečajni upravnik podnese prijedlog za prinudno poravnanje ili
 2. ako stečajni upravnik podnese elaborat o mogućnosti prodaje stečajnog dužnika kao pravnog lica, iz kojeg se vidi da bi vrijednost stečajnog dužnika kao pravnog lica opala, zbog prekida poslovanja.
- (2) Stečajni sudija će dozvoliti nastavak poslovanja i izvršavanje drugih aktivnosti iz stava 1 ovog člana na prijedlog stečajnog upravnika i nakon pribavljenog mišljenja odbora povjerilaca ako se ovakav odbor uspostavi.
- (3) U slučaju iz tačke 2 prvog stava ovog člana, stečajni sudija će rješenjem, kojim se dozvoljava nastavak poslovanja i izvršavanje ostalih tekućih aktivnosti, utvrditi rok u kome stečajni upravnik mora pripremiti prijedlog za prodaju dužnika kao pravnog lica. Gore navedenim rješenjem stečajni sudija takođe imenuje odbor povjerilaca u skladu sa propisima o imenovanju odbora povjerilaca u postupku prinudnog poravnanja, ako ovaj odbor nije prethodno osnovan.
- (4) Ako stečajni sudija dozvoli nastavak proizvodnje i izvršavanje drugih tekućih aktivnosti, stečajni upravnik može otuđiti i opteretiti imovinu stečajnog dužnika i dati garanciju ili aval samo sa dozvolom stečajnog sudije. Stečajni sudija takođe može zaključivanje ostalih ugovora u vezi sa nastavkom proizvodnje i izvršavanjem tekućih aktivnosti usloviti svojim pristankom.
- (5) Ako stečajni sudija dozvoli nastavak proizvodnje i vršenje ostalih tekućih aktivnosti, stečajni upravnik mora podnositi mjesečne izvještaje stečajnom sudiji o poslovanju i mora priložiti ažurirani mjesečni obračun, izvještaj o profitu i gubicima kao i izvještaj o kretanju sredstava.
- (6) Ako stečajni sudija dozvoli nastavak proizvodnje i izvršavanje drugih tekućih aktivnosti, stečajni upravnik mora zaključiti ugovor o radu na određeno vrijeme sa potrebnim brojem radnika.

Član 74

Potraživanja povjerilaca koja se pojave na osnovu pravnog posla iz članova 71, 72 i 73 ovog zakona računaju se u troškove stečajnog postupka.

Prijavlivanje potraživanja

Član 75

- (1) Povjerioci moraju prijaviti svoja potraživanja stečajnom sudiji u roku od šezdeset (60) dana od dana objavljivanja otvaranja stečajnog postupka u “Službenom glasniku Brčko Distrikta Bosne i Hercegovine” ili u “Službenom glasniku Bosne i Hercegovine”.
- (2) Pored odredbe stava 1 ovog člana, povjerioci su dužni prijaviti:
 1. potraživanje koje je nastalo zbog odustajanja od ugovora u roku od trideset (30) dana od dana kada je povjerilac primio obavještenje stečajnog upravnika o odustajanju od ugovora;
 2. potraživanja koja su nastala kao rezultat uspješnog pobijanja u roku od trideset (30) dana od pravosnažnosti presude.
- (3) Povjerioci prijavljuju potraživanja pismeno i u prijavi moraju naznačiti:
 1. naziv, odnosno ime i adresu povjerioca;
 2. pravni osnov i iznos potraživanja;
 3. broj računa povjerioca.
- (4) Ako se prijavljuju potraživanja po kojim je parnični postupak u toku, u prijavi se navodi sud pred kojim se vodi postupak s oznakom spisa.
- (5) Razlučni povjerioci označavaju u prijavi dio imovine dužnika na koji se njihov zahtjev odnosi i iznos do kojeg njihova potraživanja neće biti pokrivena razlučnim pravom.
- (6) Izlučni povjerioci označavaju u prijavi dio imovine na koji se njihov zahtjev odnosi.
- (7) Stečajni sudija će odbaciti prijavljena potraživanja povjerilaca podnesena nakon isteka roka iz stavova 1 i 2 ovog člana.

Član 76

Potraživanja prijavljena povodom oglasa za zaključenje prinudnog poravnjanja takođe će se smatrati prijavljenim u toku stečajnog postupka.

Član 77

- (1) Solidarni dužnici i jamci dužnika mogu kao stečajni povjerioci tražiti da im se vrati ono što su za dužnika platili prije ili poslije dana otvaranja stečajnog postupka, ako im pripada pravo na regres prema dužniku.

- (2) Solidarni dužnici i jamci mogu podnijeti i zahtjev da im se osigura iznos koji plate za dužnika srazmjerno iznosu koji bi im pripadao kao stečajnim povjeriocima (član 54, stav 1 i 2).

Član 78

Povjerilac kome solidarni dužnici duguju na osnovu istog potraživanja može prijaviti ovakvo potraživanje u čitavom iznosu u stečajnom postupku svakog solidarnog dužnika dok se ne isplati u potpunosti.

Ispitivanje prijavljenih potraživanja

Član 79

- (1) Prijavljena potraživanja povjerioca ispituju se na ročištu za ispitivanje potraživanja.
- (2) Na ročištu za ispitivanje potraživanja sudjeluju stečajni upravnik, povjerioci koji su prijavili svoja potraživanja, kao i druga lica koja, s obzirom na poslove koje su obavljala kod ili za dužnika, imaju saznanja o postojanju i visini prijavljenih potraživanja.
- (3) Ročište za ispitivanje potraživanja održaće se i bez prisustva svih povjerilaca koji su prijavili svoja potraživanja a uredno su pozvani.

Član 80

- (1) Stečajni upravnik dužan je da se o svakom prijavljenom potraživanju izjasni da li ga priznaje ili osporava. Stečajni upravnik može prije saslušanja pripremiti spisak prijavljenih potraživanja navodeći koja od prijavljenih potraživanja priznaje a koja osporava.
- (2) Povjerioci mogu osporavati prijavljena potraživanja.
- (3) Prijavljeno potraživanje smatra se utvrđenim ako ga prizna stečajni upravnik a ne ospori nijedan od povjerilaca prisutnih na ročištu za ispitivanje potraživanja.
- (4) Stečajni sudija može dozvoliti stečajnom upravniku da se izjasni o pojedinačnom potraživanju, koje je blagovremeno prijavljeno, na jednom od sljedećih ročišta za ispitivanje potraživanja.

Član 81

- (1) Stečajni upravnik je dužan da se izjasni da li priznaje ili osporava svako prijavljeno razlučno ili izlučno pravo.
- (2) Povjerioci mogu osporavati prijavljena razlučna ili izlučna prava.

- (3) Ako se stečajni upravnik izjasni da priznaje izlučno pravo, a niti jedan od povjerilaca ne ospori to pravo, stečajni sudija će donijeti rješenje kojim obavezuje stečajnog dužnika da isporuči povjeriocu dio stvari na koje se odnosi priznato izlučno pravo, ako povodom ovakvog potraživanja nije donijeta drugačija pravosnažna odluka. Protiv ovoga rješenja nije dozvoljena žalba.
- (4) Ako stečajni povjerilac prizna potraživanje i pravo na posebnu isplatu tog potraživanja iz dijela imovine dužnika za koja postoji razlučno pravo, a ni potraživanje niti razlučno pravo nije osporeno od bilo kog povjerioca, stečajni sudija će donijeti rješenje o nastavku izvršenja, odnosno rješenje o utvrđenju potraživanja i obavezi stečajnog dužnika da plati utvrđeno potraživanje iz dijela sredstava za koje postoji razlučno pravo. Protiv ovoga rješenja nije dozvoljena žalba.
- (5) Ako stečajni upravnik ili neko od povjerilaca ospori neko izlučno, odnosno razlučno pravo koje je stečeno upisom u zemljišnu knjigu ili ako je izlučni ili razlučni povjerilac već stekao izvršnu ispravu za ovo pravo, stečajni sudija će uputiti stečajnog upravnika ili povjerioca koji je osporio pravo, da pokrene postupak pred sudom ili drugim organom u roku od petnaest (15) dana od dana dostavljanja rješenja, radi utvrđenja nepostojanja osporenog potraživanja. U svim ostalim slučajevima stečajni sudija upućuje izlučnog i razlučnog povjerioca da ostvaruje svoje pravo u istom roku pred sudom ili drugim organom.
- (6) Ako stečajni upravnik ili povjerilac iz stava 5 ovog člana ne pokrene postupak u propisanom roku, smatraće se da je izlučno odnosno razlučno pravo priznato, a stečajni sudija će na prijedlog izlučnog odnosno razlučnog povjerioca donijeti rješenje iz stava 3 ili 4 ovog člana.

Član 82

- (1) Stečajni sudija će rješenjem uputiti povjerioca čije je potraživanje osporeno da u roku od petnaest (15) dana od dana dostavljanja rješenja, pokrene postupak pred sudom ili drugim organom radi utvrđivanja osporenog potraživanja.
- (2) Ako povjerilac iz stava 1 ovog člana ne pokrene postupak u propisanom roku, njegovo potraživanje neće biti uzeto u obzir prilikom podjele stečajne mase.
- (3) Ako stečajni upravnik ili drugi povjerilac ospori potraživanje povjerioca koji je već primio konačnu izvršnu ispravu za ovo potraživanje, stečajni sudija će uputiti osobu koja osporava potraživanje da u roku od petnaest (15) dana od dana dostavljanja rješenja, pokrene postupak pred sudom ili drugim organom, radi utvrđenja da ne postoji osporeno potraživanje.
- (4) Ako stečajni upravnik ili povjerilac iz stava 3 ovog člana ne pokrenu postupak u propisanom roku, smatraće se da je potraživanje utvrđeno.
- (5) Povjerilac koji pokrene postupak u skladu sa stavom 1 i 3 ovog člana, dužan je o tome obavijestiti stečajnog sudiju. Ukoliko povjerilac ne postupi na ovaj način snosiće odgovornost za štetu koja na ovaj način bude prouzrokovana.

Član 83

- (1) Troškovi postupka iz člana 82 stav 1 i 3 ovog zakona, uključuju se u troškove stečajnog postupka, ako stečajni upravnik neosnovano ospori potraživanje.
- (2) Stečajni sudija može odrediti da troškove iz stava 1 ovog člana snosi stečajni upravnik, ako je iz obijesti osporio potraživanje ili je na takav način vodio postupak.

Prodaja dužnika

Član 84

- (1) Stečajni sudija može na osnovu stručne procjene i mišljenja, odlučiti da se dužnik proda kao pravno lice, ako postoji saglasnost odbora povjerilaca, ukoliko je osnovan i nakon što pribavi mišljenje stečajnog upravnika.
- (2) Izjavu o saglasnosti iz stava 1 ovog člana, odbor povjerilaca je dužan dati u roku od osam (8) dana od prijema poziva da se izjasni. Ako se odbor povjerilaca u tom roku ne izjasni, smatraće se da je saglasan da se dužnik proda kao pravno lice.
- (3) Prodaja dužnika kao pravnog lica obavlja se po pravilu javnim nadmetanjem, prikupljanjem ponuda ili neposrednom pogodbom.
- (4) Prodaja dužnika kao pravne osobe može se odrediti samo uz uslov da se na taj način postignu povoljniji uslovi za namirenje povjerilaca.
- (5) Stečajni upravnik kao predstavnik stečajnog dužnika zaključuje ugovor o prodaji dužnika kao pravnog lica.

Član 85

- (1) Stečajni sudija donosi odluku o predaji prodatog dužnika kao pravnog lica kupcu, kada kupac plati iznos prodajne cijene.
- (2) Stečajni sudija može donijeti odluku o predaji prodatog dužnika kao pravnog lica kupcu, prije isplate prodajne cijene, ako kupac podnese neopozivu bankarsku garanciju na prvi poziv ili ako pruži drugo odgovarajuće obezbjeđenje za plaćanje prodajne cijene.
- (3) Sredstva od prodaje dužnika kao pravnog lica stavljaju se u stečajnu masu.
- (4) Nakon isplate prodajne cijene, stečajni sudija će obustaviti stečajni postupak protiv prodatog pravnog lica i nastaviće ga protiv stečajne mase iz koje se isplaćuju povjerioci.
- (5) Za potraživanja protiv dužnika koja su nastala do obustave stečajnog postupka ni dužnik ni njegov kupac ne odgovaraju povjeriocima.
- (6) Prodaja dužnika kao pravnog lica ne utiče na izlučno pravo.

- (7) Razlučna prava ostaju na snazi nakon prodaje dužnika kao pravnog lica. Ova prava prestaju da postoje u mjeri u kojoj će biti realizovana u nastavku stečajnog postupka u skladu sa stavom 4 ovog člana.
- (8) Odluke o prestanku radnog odnosa zaposlenih ostaju na snazi (član 44 stav 1).

Član 86

Ukoliko nije drugačije određeno u poglavlju o prodaji dužnika, za prodaju će se primjenjivati odredbe o unovčavanju imovine dužnika.

Unovčavanje imovine dužnika

Član 87

- (1) Imovina dužnika koja ulazi u stečajnu masu prodaje se, po pravilu, javnim nadmetanjem.
- (2) Stečajni sudija može takođe, po prethodno pribavljenom mišljenju odbora povjerilaca, odabrati drugi način prodaje (prikupljanjem ponuda ili neposrednom pogodbom), ukoliko zakonom nije drugačije određeno.
- (3) Lica koja imaju pravo preče kupovine obavještavaju se o prodaji imovine dužnika.
- (4) Ukoliko je izlučni ili razlučni povjerilac blagovremeno prijavio svoje izlučno ili razlučno pravo i blagovremeno započeo postupak iz člana 81 stav 5 ovog zakona, stečajni upravnik ne može prodati dio imovine, na kojem je povjerilac zasnovao izlučno ili razlučno pravo, sve dok povjeriočevo izlučno ili razlučno potraživanje ne bude odbijeno na pravovaljan način.

Član 88

- (1) Imovina, ili dio imovine koja čini funkcionalnu cjelinu u procesu proizvodnje (postrojenja, uređaji i sl.) prodaje se, po pravilu, javnim nadmetanjem, i to ponajprije kao cjelina sa zgradom i zemljištem, a ako to nije moguće onda bez zgrade i zemljišta.
- (2) Za zgradu koja je namijenjena obrazovanju, nauci, kulturi, zdravstvu i socijalnom osiguranju, kao i stvari ugrađene u te zgrade koje služe obrazovanju, nauci, kulturi, zdravlju i socijalnom osiguranju, odredit će se pravo preče kupovine licima koja ispunjavaju uslove za vršenje tih djelatnosti.

Član 89

- (1) Prije dana određivanja javne prodaje, sudskim vještačenjem procjenjuje se stvarna vrijednost stvari i prava koja su predmet prodaje.
- (2) Stečajni sudija određuje cijenu u skladu sa mišljenjem stečajnog upravnika i odbora povjerilaca, ukoliko je takav odbor obrazovan.

- (3) Početna prodajna cijena ne može biti niža od polovine procijenjene vrijednosti.
- (4) Ako se prodaja ne može izvršiti po cijeni iz stava 3 ovog člana, stečajni sudija može odobriti prodaju po nižoj cijeni.
- (5) Ako se od vremena kada je obavljena procjena vrijednosti stvari ili prava do njihove prodaje, vrijednost stvari ili prava znatnije izmijeni, odrediće se nova cijena.

Član 90

- (1) Stečajni sudija rješenjem kojim određuje prodaju takođe utvrđuje:
 1. način prodaje;
 2. početnu cijenu ako je u pitanju javno nadmetanje ili najnižu prodajnu cijenu u slučaju prikupljanja ponuda ili neposredne prodaje;
 3. rok u kome kupac mora isplatiti kupovnu cijenu;
 4. iznos osiguranja koji ne može biti niži od 10% od cijene iz tačke 2 ovog stava;
 5. način polaganja osiguranja (naprimjer, uplatom na račun stečajnog dužnika, predajom bariranog čeka ili neopozive bankarske garancije po prvom pozivu);
 6. način obezbjeđenja isplate kupovne cijene i rok za predaju sredstva obezbjeđenja u slučaju da je rok za isplatu kupovne cijene duži od petnaest (15) dana;
 7. uslovi predaje prodane stvari ili predaje prodatog prava.
- (2) Rok u kome kupac mora isplatiti kupovnu cijenu ne može biti duži od šest (6) mjeseci od dana potpisivanja ugovora, bez obzira da li se kupovna cijena isplaćuje odjednom ili u ratama.
- (3) Predaja prodane stvari ili predaja prodatog prava neće se dozvoliti prije isplate kupovne cijene ili pribavljanja osiguranja iz stava 1, tačka 7 ovog člana.

Član 91

- (1) Kupac ne može biti :
 1. stečajni sudija, stečajni upravnik ili drugo lice koje zvanično učestvuje u prodaji,
 2. lice koje je u posljednjih pet (5) godina prije otvaranja stečajnog postupka obavljalo kod dužnika funkciju člana uprave, člana nadzornog odbora, radnika sa posebnim ovlašćenjima ili prokuriste,
 3. pravno lice, ako je njegov vlasnik ili suvlasnik najmanje jedne desetine (1/10) osnovnog kapitala lica iz tačke 2 ovog stava ili član njegove porodice.
- (2) Pod članom porodice iz prethodnog stava podrazumijeva se supružnik, osoba sa kojom se živi u vanbračnoj zajednici, usvojenik, usvojlac, srodnik u pravoj liniji, srodnik u pobočnoj liniji do četvrtog stepena srodstva i tazbinski srodnik do četvrtog stepena srodstva.
- (3) Prije zaključenja pravnog posla prodaje dužnika, kupac je dužan stečajnom upravniku priložiti javnu ispravu nadležnog organa, kojom se dokazuje ili potvrđuje, da ne postoje činjenice ili okolnosti iz stava 1 tačke 2 i 3 ovog člana ili ovjerenu izjavu sa kojom pod materijalnom i krivičnom odgovornošću izjavljuje da ne postoje činjenice ili okolnosti iz stava 1 tačke 2 i 3 ovog člana.

Član 92

- (1) Stečajni upravnik prodaje imovinu prema uputstvima i pod nadzorom stečajnog sudije.
- (2) Javna ponuda ili poziv za prikupljanje ponuda oglašava se na oglasnoj tabli suda. Ako se radi o stvarima ili pravima veće vrijednosti, nepokretnostima i uređajima, o čemu odlučuje stečajni sudija, oglašavanje se vrši u dnevnoj štampi najkasnije osam (8) dana prije prodaje.
- (3) Pored navedenog u članu 90, stav 1 ovog zakona, oglas iz ovog člana sadrži i vrijeme kada se predmeti koji su na prodaji, mogu razgledati kao i vrijeme i mjesto prodaje.
- (4) Po izvršenom javnom nadmetanju ili zaključenju postupka za prikupljanje ponuda, stečajni upravnik će sačiniti, u ime stečajnog dužnika, ugovor sa licem koje je u nadmetanju ponudilo najvišu cijenu.
- (5) Ako je javna prodaja ostala u cjelini ili djelimično neuspješna, stečajni upravnik može u saglasnosti sa stečajnim sudijom i odborom povjerilaca, nakon ročišta za javnu prodaju, prodati stvari i prava koja su predmet prodaje, po cijeni nižoj od početne cijene. Stečajni sudija i odbor povjerilaca dužni su saglasnost za prodaju da daju odmah ili najkasnije u roku od tri (3) dana po pozivu stečajnog upravnika.

Član 93

- (1) Isplatom kupovne cijene sva založna prava kao i stvarni tereti koji su postojali na prodatoj stvari ili prodatim pravima prestaju da postoje.
- (2) Razlučni povjerioci čija su potraživanja i razlučna prava priznata namiruju se prvi iz kupovne cijene.
- (3) Ukoliko je jedan razlučni povjerilac u stečajnom postupku blagovremeno prijavio i svoje potraživanje i svoje razlučno pravo na prodatoj stvari, a potraživanje ili razlučno pravo je osporeno, odgovarajući dio će se izdvojiti, u skladu sa članom 97 ovog zakona, iz prodajne cijene kao obezbijeđenje isplate do donošenja pravosnažne odluke u postupku iz člana 81, stav 5 ovog zakona.

Član 94

Odredbe opštih propisa o obaveznim i materijalno pravnim posljedicama prodaje prinudnim javnim nadmetanjem primjenjuju se i na prodaju imovine stečajnog dužnika na drugi način.

Član 95

- (1) Ukoliko imovina koja čini stečajnu masu ne bude prodana, podijeliće se među povjeriocima koji je prihvataju, vodeći računa o iznosu njihovih potraživanja.

- (2) Imovina koja se nije mogla rasporediti povjeriocima u smislu prethodnog stava ovog člana, predaje se Brčko Distriktu BiH na upravljanje.

Namirenje povjerilaca

Član 96

Prije nego što se pristupi namirivanju povjerilaca, iz stečajne mase izdvojiće se iznos potreban za plaćanje troškova stečajnog postupka. Povjerioci se namiruju iz preostalog dijela (diobna masa).

Član 97

- (1) Srazmjerni dio sredstava biće izdvojen iz stečajne mase radi osiguranja osporenih potraživanja onih povjerilaca koji su blagovremeno pokrenuli poseban postupak za utvrđivanje svojih potraživanja.
- (2) Ukoliko povjerilac ne uspije u posebnom postupku pokrenutom radi utvrđivanja svog osporenog potraživanja, izdvojena sredstva će se podijeliti na druge povjerioce.

Član 98

- (1) Dugovi dužnika isplaćuju se srazmjerno iz diobne mase ako zakonom nije drugačije određeno.
- (2) Izuzetno od stava 1 ovog člana, sve zaostale plate zaposlenika u visini garantovanih do dana otvaranja stečajnog postupka, doprinosa na te plate, naknade za povrede na radu koju je zaposlenik pretrpio na radnom mjestu dužnika, kao i naknade za profesionalna oboljenja, namiruju se kao troškovi stečajnog postupka.
- (3) Kao troškovi stečajnog postupka se plaćaju takođe i potraživanja povjerilaca nastala nakon otvaranja postupka prinudnog poravnjanja na osnovu pravnih poslova, potrebnih za nastavak proizvodnje ili rada tokom ovog perioda, izuzev ako su povjerioci prihvatili ugovorom iz člana 141, stav 6 ovog zakona, da pretvore potraživanja u dionice ili udjele.
- (4) Neisplaćene plate dužnikovih zaposlenika iznad iznosa određenih u stavu 2 ovog člana, namiruju se u skladu sa stavom 1 ovog člana.
- (5) Dugovi diobne mase ne predstavljaju novčane kazne.

Član 99

Ako je povjeriocima priznato potraživanje sa raskidnim uslovom, njima se prilikom glavne diobe isplaćuje srazmjerni dio njihovog potraživanja ukoliko prilože osiguranje da će ono što su primili vratiti ako se do konačne diobe ispuni raskidni uslov. Ako povjerilac ne podnese osiguranje, srazmjerni dio njegovog potraživanja isplaćuje se konačnom diobom ukoliko se do tog vremena ne ispuni raskidni uslov.

Član 100

Diobi se pristupa kada je znatan dio imovine unovčen.

Član 101

- (1) Stečajni sudija odobrava na osnovu prijedloga stečajnog upravnika nacrt za glavnu diobu.
- (2) Nacrt za glavnu diobu sadrži podatke o:
 1. visini novčanih sredstava namijenjenih za diobu;
 2. povjeriocima i iznosu njihovih priznatih potraživanja;
 3. povjeriocima koji imaju obezbjeđenje potraživanja i iznosi njihovih potraživanja;
 4. procentualnom učešću potraživanja pojedinačnog povjerioca u odnosu na iznos potraživanja iz tačaka 2 i 3 ovog stava;
 5. procentu i iznosu do kog će potraživanja iz tačke 2 ili obezbjeđenog potraživanja iz tačke 3 ovog stava, biti isplaćivana.

Član 102

- (1) Povjerioci će biti pozvani na ročište za raspravu o nacrtu za glavnu diobu, oglasom objavljenim u “Službenom glasniku Brčko Distrikta Bosne i Hercegovine” i “Službenom glasniku Bosne i Hercegovine” najmanje trideset (30) dana prije ročišta i istaknutim na oglasnu tablu suda. Stečajni sudija će takođe u oglasu obavijestiti povjerioce gdje i kada mogu da pregledaju nacrt glavne diobe.
- (2) Stečajni sudija može, prema okolnostima slučaja, odlučiti da se oglas objavi i preko javnih glasila.

Član 103

- (1) Na ročištu za raspravljanje o nacrtu za glavnu diobu povjerioci mogu podnositi prigovore na nacrt.
- (2) Nakon rasprave o glavnoj diobi stečajni sudija donosi rješenje o glavnoj diobi.
- (3) O prigovorima stečajni sudija odlučuje u rješenju o glavnoj diobi.
- (4) Rješenje o glavnoj diobi dostavlja se stečajnom upravniku i postavlja se na oglasnu tablu suda.

Član 104

Na osnovu pravosnažnog rješenja o glavnoj diobi, stečajni upravnik isplaćuje potraživanja povjeriocima u roku od petnaest (15) dana po pravosnažnosti.

Član 105

- (1) Naknadna dioba se provodi prema pritanju sredstava dužnika.
- (2) O naknadnoj diobi odlučuje stečajni sudija rješenjem.

Član 106

Sredstva koja preostanu nakon potpune isplate povjerilaca, podijeliće se dioničarima ili vlasnicima udjela, srazmjerno nominalnoj vrijednosti njihovih dionica ili udjela, osim ako osnivačkim aktom dužnika nije određen prioritet u isplati za pojedine klase dionica ili udjela, ili ako je zakonom određeno drugačije.

Zaključenje stečajnog postupka

Član 107

- (1) Kada stečajni sudija primi od stečajnog upravnika izvještaj da su svi poslovi iz stečajnog postupka okončani, donosi rješenje o zaključenju stečajnog postupka.
- (2) Stečajni sudija objavljuje rješenje o zaključenju stečajnog postupka u “Službenom glasniku Brčko Distrikta Bosne i Hercegovine” i u “Službenom glasniku Bosne i Hercegovine”.
- (3) Po zaključenju stečajnog postupka, stečajni upravnik podnosi stečajnom sudiji završni izvještaj o svom poslovanju.
- (4) Kad razmotri izvještaj, stečajni sudija razrješava stečajnog upravnika, a ako u njegovom poslovanju postoje nepravilnosti preduzima protiv njega odgovarajuće mjere.

Član 108

- (1) Ukoliko nakon otvaranja stečajnog postupka stečajni sudija utvrdi da bi dalje vođenje postupka prouzrokovalo nesrazmjerne troškove, obustaviće unovčenje diobne mase i zaključiti postupak.
- (2) Stečajni sudija može u slučaju iz stava 1 ovog člana odlučiti da se pojedine stvari iz diobne mase ili pojedina potraživanja prenesu na pojedine povjerioce, vodeći računa o visini njihovih utvrđenih potraživanja.

Upis u registar

Član 109

- (1) Prijedlog za otvaranje stečajnog postupka, rješenje o određivanju ograničenja iz člana 33, stav 1, tačka 1 i 3 ovog zakona, rješenje o otvaranju stečajnog postupka i pravosnažno rješenje o zaključenju ili obustavi stečajnog postupka upisuju se po službenoj dužnosti u sudski registar i druge službene evidencije.
- (2) Danom upisa u sudski registar rješenja o zaključenju stečajnog postupka, dužnik kao pravno lice prestaje da postoji i prethodni upisi iz stava 1 ovog člana se brišu.
- (3) U slučaju prodaje dužnika kao pravnog lica, na osnovu pravosnažnog rješenja o obustavi postupka iz člana 85, stav 4 ovog zakona, upisi u vezi sa stečajnim postupkom se brišu po službenoj dužnosti iz sudskog registra i kupac se upisuje u sudski registar kao osnivač prodatog pravnog lica.

Prinudno poravnanje u stečaju

Član 110

- (1) Do ročišta za raspravu po nacrtu za glavnu diobu, stečajni upravnik i vlasnici većinskog dijela kapitala u stečajnom dužniku koji je pravno lice, preduzetnik kao stečajni dužnik ili odbor povjerilaca, ako je osnovan, mogu podnijeti prijedlog za otvaranje postupka prinudnog poravnanja.
- (2) Prije nego što donese odluku po prijedlogu iz stava 1 ovog člana, stečajni sudija može odlučiti da se odloži unovčavanje imovine dužnika.
- (3) Stečajni sudija odlučuje po prijedlogu iz stava 1 ovog člana u roku od petnaest (15) dana od dana podnošenja prijedloga. Stečajni sudija prethodno mora pribaviti mišljenje odbora povjerilaca, ako odbor povjerilaca nije predlagač, ukoliko takav odbor postoji, kao i stečajnog upravnika ukoliko on nije predlagač.
- (4) Stečajni sudija sprovodi postupak prinudnog poravnanja a stečajni upravnik sprovodi sve dužnosti upravnika prinudnog poravnanja.
- (5) Ako se prinudno poravnanje odobri, stečajni postupak se obustavlja.
- (6) Obustavom stečajnog postupka iz stava 5 ovog člana prestaju i pravne posljedice otvaranja stečajnog postupka.
- (7) U slučaju obustave stečajnog postupka iz stava 5 ovog člana, odluke o prestanku radnog odnosa zaposlenika (član 44 stav 1) ostaju na snazi.

Član 111

- (1) Odredbe o najmanjim procentima i o rokovima isplate povjerilaca iz člana 146 ovog zakona neće se primjenjivati na postupak prinudnog poravnanja u stečaju.
- (2) Ukoliko članom 110 ovog zakona ili ovim članom nije drugačije određeno, na postupak prinudnog poravnanja u stečaju primjenjivaće se odredbe ovog zakona o prinudnom poravnanju.

IV - SKRAĆENI STEČAJNI POSTUPAK

Član 112

- (1) Ukoliko prema prethodnoj procjeni stečajna masa ne vrijedi više od 50.000 KM (stečaj male vrijednosti) primijenit će se skraćeni stečajni postupak.
- (2) Kada stečajni sudija donese rješenje o otvaranju stečajnog postupka, istovremeno će donijeti rješenje o tome da li će se primijeniti skraćeni stečajni postupak. Stečajni sudija takođe donosi takvo rješenje i u redovnom stečajnom postupku ukoliko postane očigledno da je stečaj male vrijednosti.
- (3) Ako tokom skraćenog stečajnog postupka postane očigledno da stečajni postupak koji je započet po skraćenom postupku ili je određen kao skraćeni postupak, nije male vrijednosti u smislu stava 1 ovog člana, stečajni sudija će donijeti rješenje o uspostavljanju redovnog stečajnog postupka.
- (4) Protiv rješenja stečajnog sudije iz stavova 2 i 3 ovog člana nije dozvoljena žalba.

Član 113

U skraćenom stečajnom postupku važe sljedeće odredbe:

1. sudski zapisnik se skraćuje i sadrži samo izjave i prijedloge stranaka, kao i odluke suda,
2. odluke suda koje nisu vezane za otvaranje ili zaključivanje stečajnog postupka neće se objavljivati,
3. izvršni organ izvršava popis stečajne mase,
4. u skraćenom stečajnom postupku ne osniva se odbor povjerilaca,
5. stečajni sudija može zakazati ročište radi ispitivanja potraživanja već sljedećeg dana nakon isteka roka za prijavljivanje potraživanja. Na ovom ročištu se takođe može odlučiti, ukoliko je moguće i izvodljivo, o podjeli stečajne mase.

V - PRINUDNO PORAVNANJE

Član 114

Organi u postupku prinudnog poravnanja su: sudija prinudnog poravnanja (u daljem tekstu: sudija poravnanja) i upravnik prinudnog poravnanja (u daljem tekstu: upravnik poravnanja).

Član 115

- (1) Kada sudija poravnanja utvrdi da su ispunjeni uslovi za otvaranje postupka prinudnog poravnanja, odrediće upravnika poravnanja.
- (2) Uslovi koji važe za određivanje stečajnog upravnika u stečajnom postupku, primjenjuju se i na određivanje upravnika poravnanja.

Član 116

- (1) Upravnik poravnanja je naročito dužan da:
 1. utvrdi stanje imovine i tekućih poslova dužnika,
 2. utvrdi listu povjerilaca i listu dužnikovih dužnika,
 3. prizna potraživanje povjerilaca,
 4. ospori potraživanja povjerilaca koja nisu osnovana, ako postoje razlozi za sumnju u njihovu osnovanost,
 5. izvijesti sudiju poravnanja ako dužnik postupa suprotno članu 125 ovog zakona,
 6. vrši druge dužnosti određene zakonom.
- (2) Dužnik i povjerioci mogu sudiji poravnanja uložiti prigovore na rad upravnika prinudnog poravnanja.
- (3) Upravnik prinudnog poravnanja može sa dozvolom sudije poravnanja, određene poslove povjeriti sudskom vještaku.

Član 117

- (1) Upravnik prinudnog poravnanja ima pravo na naknadu opravdanih troškova i na nagradu za svoj rad. Troškovi i nagrada za rad upravniku prinudnog poravnanja isplaćuju se iz uplaćenog predujma.
- (2) O visini naknade i nagrada upravnika prinudnog poravnanja odlučuje sudija poravnanja.

Član 118

- (1) Odredbe ovog zakona koje se odnose na nadzor nad radom stečajnog upravnika, shodno se primjenjuju na nadzor nad radom upravnika poravnanja.
- (2) Protiv odluke sudije poravnanja u vršenju nadzora nad radom upravnika poravnanja, nije dozvoljena žalba.

Član 119

- (1) Radi zaštite interesa povjerilaca u postupku prinudnog poravnanja, sudija poravnanja imenuje odlukom, koja je sastavni dio rješenja o otvaranju postupka prinudnog poravnanja, odbor povjerilaca sa liste povjerilaca iz člana 122, stav 1, tačka 3 ovog zakona, odnosno između povjerilaca koji su prijavili potraživanja, a nisu na toj listi povjerilaca. Odbor povjerilaca ima neparan broj članova i to ne manje od pet (5).
- (2) Na obrazložen prijedlog odbora povjerilaca, sudija poravnanja može zamijeniti članove odbora povjerilaca iz stava 1 ovog zakona.
- (3) Odbor povjerilaca iz stava 1 ovog člana sačinjavaju povjerioci koji su saglasni da budu članovi odbora povjerilaca i koji imaju najveća potraživanja od dužnika.
- (4) Na ročištu za prinudno poravnanje povjerioci sa pravom glasa (član 156 stav 3), daju saglasnost na odbor povjerilaca iz stava 1 ovog člana ili biraju odbor povjerilaca drugačijeg sastava.

Član 120

Odbor povjerilaca iz člana 119 ima pravo da:

1. pregleda poslovno i finansijsko stanje dužnika i da zahtijeva podatke koji su važni za izradu plana finansijske reorganizacije;
2. učestvuje u izradi plana finansijske reorganizacije;
3. predloži imenovanje ili razrješavanje upravnika poravnanja;
4. daje prijedloge i mišljenja i preduzima druge radnje važne za zaštitu interesa povjerilaca tokom postupka.

Član 121

Postupak prinudnog poravnanja se pokreće na prijedlog dužnika, ako su ispunjeni uslovi za otvaranje stečajnog postupka (član 3 ovog zakona).

Pokretanje postupka prinudnog poravnanja

Član 122

- (1) Prijedlog za otvaranje postupka prinudnog poravnanja mora sadržati naziv i adresu dužnika, činjenice iz kojih proizilazi postojanje uslova za postupak prinudnog poravnanja, prijedlog da sud otvori postupak prinudnog poravnanja i potpis predlagača.
- (2) Prijedlog za otvaranje postupka prinudnog poravnanja mora sadržati:
 1. izvještaj o dužnikovom ekonomskom i finansijskom stanju,
 2. dokumentaciju koja ukazuje na vjerovatnoću da postoje uslovi za otvaranje postupka,
 3. spisak dužnikovih povjerilaca i dužnika, kao i pravni osnov i iznos njihovih dospjelih i nedospjelih potraživanja i dugovanja,
 4. spisak razlučnih i izlučnih povjerilaca sa podacima kao u tački 3 ovog stava.

Član 123

Uz prijedlog za prinudno poravnanje može se priložiti izjava o datom jemstvu, ako prinudno poravnanje bude zaključeno.

Član 124

- (1) Ukoliko prijedlog za pokretanje postupka prinudnog poravnanja nije podnjet u skladu sa članom 122 ovog zakona, sudija poravnanja rješenjem vraća prijedlog i istovremeno određuje rok za ispravku ili dopunu, koji ne može biti kraći od osam (8) dana.
- (2) Ako predlagač ne postupi u roku iz prethodnog stava, sudija poravnanja će odbaciti prijedlog za otvaranje postupka prinudnog poravnanja.

Član 125

- (1) Od dana podnošenja prijedloga za otvaranje postupka prinudnog poravnanja do donošenja odluke o otvaranju postupka prinudnog poravnanja, dužnik može vršiti tekuće poslove vezane za tekuće aktivnosti i namirivanje tekućih obaveza.
- (2) Tokom perioda iz prethodnog stava dužnik ne može otuđiti ili opteretiti svoju imovinu, niti izdavati garancije ili biti garant mjenice.
- (3) Pravni poslovi dužnika učinjeni suprotno prethodnom stavu, ne proizvode pravne posljedice u odnosu na povjerioce.
- (4) Nakon isticanja rješenja o otvaranju postupka prinudnog poravnanja na oglasnu tablu, dužnik može vršiti samo one poslove iz stava 2 ovog člana koje odobri sudija poravnanja ili upravnik poravnanja, a nakon mišljenja odbora povjericilaca.
- (5) Mišljenje iz prethodnog stava odbor povjericilaca je dužan dostaviti u roku od osam (8) dana, a u protivnom će se smatrati da postoji saglasnost odbora povjericilaca za poslove dužnika iz stava 2 ovog člana.
- (6) Pravni poslovi koje dužnik zaključi suprotno ovom članu, ne proizvode pravne posljedice u odnosu na povjerioce, ukoliko je druga strana znala ili je mogla znati da je takav posao izvan obima tekućeg poslovanja dužnika i da dužnik nije imao dozvolu za pravni posao od sudije poravnanja ili upravnika poravnanja, ako je tako određeno ili da je sudija poravnanja ili upravnik poravnanja bio protiv zaključenja tog posla.

Otvaranje postupka prinudnog poravnanja

Član 126

- (1) Ako sudija poravnanja ne odbaci prijedlog za otvaranje postupka prinudnog poravnanja u skladu sa članom 124 ovog zakona, donosi rješenje o otvaranju postupka prinudnog poravnanja.
- (2) Rješenjem o otvaranju postupka prinudnog poravnanja, sudija poravnanja zahtijevaće od predlagača da deponuje avans za troškove postupka i odrediće rok za uplatu avansa koji ne može biti kraći od osam (8) dana.
- (3) Ako do isteka roka iz stava 2 ovog člana predlagač ne uplati avans, niti to učine osnivač ili neko drugo lice, sudija poravnanja će obustaviti postupak prinudnog poravnanja.
- (4) Rješenje o otvaranju postupka prinudnog poravnanja dostavlja se predlagaču.

Član 127

- (1) Nakon donošenja rješenja o otvaranju postupka prinudnog poravnanja, sudija poravnanja može, na prijedlog povjerioca, a po pribavljenom mišljenju odbora povjerilaca, odrediti isplate sa računa dužnika na način koji je u skladu sa postupkom prinudnog poravnanja, i obavijestiti banku koja vrši platne transakcije za račun dužnika o ovom ograničenju.
- (2) Odbor povjerilaca je dužan da dostavi mišljenje iz prethodnog stava u roku od osam (8) dana od prijema zahtjeva vijeća poravnanja.
- (3) Prethodno mišljenje nije potrebno ako se radi o obavezama iz tekućeg poslovanja ili za troškove postupka prinudnog poravnanja.
- (4) U postupku prinudnog poravnanja dužnik je u obavezi da omogući povjericima na njihov zahtjev, pregled poslovnih knjiga i finansijske dokumentacije i da im obezbijedi sve informacije od značaja za utvrđivanje ekonomske i finansijske situacije dužnika ili za sastavljanje plana finansijske reorganizacije dužnika.

Član 128

- (1) Predlagač može povući svoj prijedlog za otvaranje postupka prinudnog poravnanja u bilo koje vreme do dana određenog za ročište o prinudnom poravnanju.
- (2) U slučaju iz stava 1 ovog člana sudija poravnanja obustavlja postupak.

Član 129

- (1) Sudija poravnanja obustavlja postupak na osnovu obrazloženog prijedloga odbora povjerilaca, bilo kojeg povjerioca koji je prijavio potraživanje, ili upravnika poravnanja, ukoliko utvrdi da:

1. dužnik može ispuniti obaveze bez finansijske reorganizacije,
 2. se dužnik ponaša suprotno članu 125 ovog zakona usljed čega je mogućnost isplate povjerilaca umanjena,
 3. ne postoji mogućnost da dužnik ispuni obaveze na osnovu prijedloga za prinudno poravnanje.
- (2) U slučaju iz tačke 2 i 3 prethodnog stava ovog člana, sudija poravnanja nastavlja stečajni postupak po službenoj dužnosti.
- (3) Prijedlog iz stava 1 ovog člana može se uložiti najkasnije do početka glasanja o predloženom prinudnom poravnanju na ročištu za prinudno poravnanje.

Član 130

- (1) Po prijemu prijedloga za obustavu postupka iz člana 129 ovog zakona, sudija poravnanja zakazuje ročište za raspravu o tom prijedlogu. Sudija poravnanja poziva predlagača, dužnika, članove odbora povjerilaca i upravnika poravnanja, uz poziv dostavlja i prijedlog za obustavu postupka.
- (2) Sudija poravnanja mora donijeti rješenje o prijedlogu za obustavu postupka na ročištu iz stava 1 ovog člana ili najkasnije u roku od tri (3) dana nakon ročišta.
- (3) Protiv rješenja kojim sudija poravnanja odbacuje prijedlog za obustavu postupka, nije dozvoljena posebna žalba.
- (4) U slučaju kada je ročište za prinudno poravnanje već određeno, sudija poravnanja može odlučiti da raspravi prijedlog za obustavu postupka na ročištu za prinudno poravnanje. Sudija poravnanja o istom obavještava lica iz stava 1 ovog člana i dostavlja im prijedlog za obustavu postupka.

Član 131

- (1) Sudija poravnanja obavještava oglasom povjerioce o otvaranju postupka prinudnog poravnanja.
- (2) Oglas se postavlja na oglasnu tablu suda i objavljuje u “Službenom glasniku Brčko Distrikta Bosne i Hercegovine” i u “Službenom glasniku Bosne i Hercegovine”. Oglas se postavlja na oglasnu tablu suda istog dana kada je donijeto rješenje o otvaranju postupka prinudnog poravnanja.
- (3) Sudija poravnanja može odlučiti da se obavještenje objavi i u javnim medijima.

Član 132

Oglas o otvaranju postupka prinudnog poravnanja sadrži:

1. naziv suda,
2. naziv ili ime i adresu dužnika,
3. izvod iz rješenja o otvaranju postupka prinudnog poravnanja sa brojem pod kojim se predmet vodi,

4. poziv svim povjeriocima čija potraživanja su nastala do dana objavljivanja oglasa o otvaranju postupka prinudnog poravnanja na oglasnoj tabli suda, da prijave svoja potraživanja sudu obrazloženom molbom, u dva primjerka, i sa priloženim dokazima, u roku od šezdeset (60) dana od dana objavljivanja oglasa u “Službenom glasniku Brčko Distrikta Bosne i Hercegovine” ili u “Službenom glasniku Bosne i Hercegovine”.
5. upozorenje povjeriocima da mogu osporiti potraživanja drugih povjerilaca u roku od trideset (30) dana od isteka roka iz prethodnog stava,
6. ime upravnika poravnanja,
7. nazive ili mjesta i adrese članova odbora povjerilaca,
8. datum kada je oglas postavljen na oglasnu tablu suda.

Član 133

Pravne posljedice otvaranja postupka prinudnog poravnanja nastupaju na dan kada je oglas o otvaranju postupka prinudnog poravnanja istaknut na oglasnoj tabli suda.

Član 134

- (1) Danom otvaranja postupka prinudnog poravnanja ne može se protiv dužnika dopustiti mjera obezbjeđenja niti prinudno izvršenje radi namirenja potraživanja u pogledu kojih postoji izvršna ili vjerodostojna isprava.
- (2) Postupci obezbjeđenja i izvršenja iz stava 1 ovog člana koji su u toku, prekidaju se.
- (3) Stav 1 i stav 2 ovog člana ne primjenjuju se na izlučne povjerioce, niti na različne povjerioce koji su pravo na odvojeno namirenje stekli šezdeset (60) dana prije dana otvaranja postupka prinudnog poravnanja.
- (4) Stav 1 i stav 2 ovog člana ne primjenjuju se na povjerioce iz člana 98 stav 2 ovog zakona.

Član 135

- (1) Na dan otvaranja postupka prinudnog poravnanja nedospjela novčana i nenovčana potraživanja povjerilaca prema dužniku smatraju se dospjelim.
- (2) Nenovčana potraživanja povjerilaca prema dužniku postaju novčana potraživanja u skladu sa cijenama na dan otvaranja postupka prinudnog poravnanja.
- (3) Novčana i nenovčana potraživanja povjerilaca prema dužniku, koja se odnose na povremena davanja pretvaraju se u jednokratna novčana potraživanja.
- (4) Potraživanja povjerioca u stranoj valuti postaju potraživanja u domaćoj valuti utvrđena prema srednjem kursu Centralne banke Bosne i Hercegovine na dan otvaranja postupka prinudnog poravnanja.

Član 136

Nedospjela novčana potraživanja na koja se ne računa kamata, snižavaju se (oduzimaju) u skladu sa zakonskom kamatom (član 51) od dana otvaranja postupka prinudnog poravnanja do dana dospijeca potraživanja. Na potraživanja koja su na ovaj način snižena, teče kamata od dana otvaranja postupka prinudnog poravnanja do dana isplate.

Član 137

- (1) Potraživanja povjerioca koja se na dan otvaranja postupka prinudnog poravnanja mogu prebiti sa potraživanjem dužnika, smatraće se prebijenim.
- (2) Prebijaju se i potraživanja, odnosno protivpotraživanja koja nisu dospjela na dan otvaranja postupka prinudnog poravnanja, kao i potraživanja, odnosno protivpotraživanja koja ne glase na novčani iznos.

Član 138

- (1) Ako u periodu do otvaranja postupka prinudnog poravnanja niti jedna strana nije u potpunosti izvršila obaveze iz dvostrano teretnog ugovora, dužnik može predložiti sudiji poravnanja da mu dozvoli odustanak od ugovora.
- (2) Dužnik može podnijeti prijedlog iz prethodnog stava u roku od trideset (30) dana od dana otvaranja postupka prinudnog poravnanja. Sudija poravnanja će odlučiti o ovom prijedlogu nakon pribavljanja mišljenja druge ugovorne strane i upravnika poravnanja, Sudija poravnanja će dozvoliti dužniku da odustane od ugovora, ako utvrdi da bi u suprotnom izvršenje ugovora ili prinudnog poravnanja postalo neizvjesno i da odustajanje od ugovora neće prouzrokovati nesrazmjernu štetu drugoj strani.
- (3) Protiv odluke sudije poravnanja kojom se dužniku dozvoljava odustanak od ugovora, nije dozvoljena žalba.
- (4) Dužnik može odustati od ugovora u roku od osam (8) dana od prijema odluke sudije poravnanja kojom se dozvoljava odustanak od ugovora. U tom slučaju, druga ugovorna strana je dužna vratiti sve što je primila po osnovu ugovora. Druga ugovorna strana može tražiti naknadu štete pod uslovima iz prinudnog poravnanja.

Član 139

Ako ni dužnik ni druga ugovorna strana nije ispunila u potpunosti obaveze iz dvostrano teretnog ugovora do otvaranja postupka prinudnog poravnanja, a dužnik nije odustao od ugovora, svaka ugovorna strana je dužna izvršiti svoje ugovorne obaveze, bez obzira na zaključeno prinudno poravnanje.

Član 140

Ugovori o zakupu koje je dužnik zaključio do dana otvaranja postupka prinudnog poravnanja, ostaju na snazi.

Član 141

- (1) Povjerioci moraju prijaviti svoja potraživanja u roku od šezdeset (60) dana od dana objave otvaranja postupka prinudnog poravnania u “Službenom glasniku Brčko Distrikta Bosne i Hercegovine” ili u “Službenom glasniku Bosne i Hercegovine”. Prijavljuju se potraživanja nastala do dana otvaranja postupka prinudnog poravnania.
- (2) Prijava iz prethodnog stava sadrži:
 - 1) naziv odnosno ime i prezime i adresu dužnika,
 - 2) pravni osnov i iznos potraživanja,
 - 3) dokaze na kojima se zasnivaju potraživanja.
- (3) Povjerioci koji imaju potraživanja u stranoj valuti prijavljuju potraživanja u stranoj valuti uz naznaku protivvrijednosti u domaćoj valuti prema srednjem kursu Centralne Banke Bosne i Hercegovine na dan otvaranja postupka prinudnog poravnania.
- (4) Povjerioci sa potraživanjima koja u sebi sadrže kamatu prijavljuju pored glavnice, dospjele kamate (ugovorene i zatezne), obračunate do dana otvaranja postupka prinudnog poravnania.
- (5) Povjerioci čija potraživanja nisu dospjela do dana otvaranja postupka prinudnog poravnania, a ne sadrže kamatu, prijavljuju potraživanja u sniženom iznosu (član 136 ovog zakona) na dan otvaranja postupka prinudnog poravnania.
- (6) Bez obzira na odredbe iz stava 1 ovog člana, povjerioci čija su potraživanja nastala nakon otvaranja postupka prinudnog poravnania, takođe prijavljuju potraživanja, ako ona proizilaze iz pravnih poslova neophodnih da dužnik nastavi poslovanje za vrijeme postupka prinudnog poravnania i ako su povjerioci prihvatili posebno zaključenim ugovorom sa dužnikom, da pretvore ova potraživanja u dionice ili udjele, pod uslovom da se prinudno poravnanje odobri.
- (7) Povjerioci iz stava 5 ovog člana su dužni da prijave potraživanja u roku od pet (5) dana od zaključivanja ugovora o pretvaranju potraživanja u dionice ili udjele, a najkasnije do ročišta za prinudno poravnanje.

Član 142

- (1) Dužnik, povjerioci i upravnik poravnania, mogu u roku od trideset (30) dana nakon isteka roka za prijavu potraživanja, da podnesu sudu prigovor protiv prijavljenog potraživanja.
- (2) Bez obzira na odredbe iz stava 1 ovog člana, prigovori protiv potraživanja iz člana 141 stav 6 ovog zakona, mogu se uložiti do ročišta za prinudno poravnanje.
- (3) Potraživanja protiv kojih nisu uloženi prigovori iz stava 1 i 2 ovog člana, smatraju se utvrđenim potraživanjima.

Član 143

Prijavljivanjem potraživanja prekida se zastarijevanje potraživanja. Rok zastarijevanja počinje da teče nakon isteka vremena koje je određeno za plaćanje u prinudnom poravnanju. Ako prinudno poravnanje nije odobreno i sud nije po službenoj dužnosti pokrenuo stečajni postupak, rok zastarijevanja počinje da teče nakon pravosnažnosti rješenja o obustavi postupka prinudnog poravnanja.

Plan finansijske reorganizacije

Član 144

- (1) Dužnik je dužan da priloži plan finansijske reorganizacije u roku od dva (2) mjeseca od dana podnijetog prijedloga za otvaranje postupka prinudnog poravnanja. Plan mora biti priložen u najmanje deset (10) kopija.
- (2) Ako dužnik ne priloži plan finansijske reorganizacije u roku iz stava 1 ovog člana, sudija poravnanja će obustaviti postupak.
- (3) Plan se dostavlja upravniku poravnanja i članovima odbora povjerilaca.

Član 145

- (1) U planu finansijske reorganizacije dužnik predlaže prinudno poravnanje, koje sadrži:
 - 1) klase potraživanja s obzirom na pravni i poslovni osnov i druge karakteristike, ako dužnik za pojedine klase potraživanja predlaže različit procenat umanjavanja (na primjer, klasa kratkoročnih kredita, klasa dugoročnih investicionih kredita, klasa potraživanja dužnikovih dobavljača robe, klasa potraživanja dužnikovih zaposlenika),
 - 2) klase potraživanja na koje ne utiče odobrenje plana finansijske reorganizacije,
 - 3) prijedlog za isplatu potraživanja u smanjenom iznosu i krajnji rok za isplatu za svaku klasu potraživanja, izuzev potraživanja iz tačke 2 ovog stava,
 - 4) prijedlog za jednako, procentualno smanjenje potraživanja ili odlaganje dospijuća plaćanja u okviru iste klase potraživanja, izuzev ako se određeni povjerilac te klase potraživanja izričito i u pismenoj formi saglasi sa nepovoljnijim uslovima isplate.
- (2) Kada je određeni povjerilac prihvatio da mu se potraživanje umjesto u novcu, izmiri drugom imovinom dužnika (član 146, stav 1), dužnik mora u planu finansijske reorganizacije da navede:
 - 1) visinu potraživanja koje se izmiruje drugom imovinom dužnika,
 - 2) vrstu imovine kojom se potraživanje izmiruje,
 - 3) vrijednost imovine kojom se potraživanje izmiruje.
- (3) Kada određeni povjerilac pristaje da svoje potraživanje izmiri pretvaranjem u osnovni kapital dužnika, dužnik u planu finansijske reorganizacije mora navesti:
 - 1) novu visinu osnovnog kapitala (član 149, stav 1, tačka 2),
 - 2) visinu potraživanja koje se izmiruje pretvaranjem u osnovni kapital,
 - 3) dio (u nominalnom i procentualnom iznosu) u osnovnom kapitalu dužnika koji je povjerilac stekao pretvaranjem potraživanja.

- (4) Uz plan finansijske reorganizacije dužnik mora priložiti:
- 1) obračunski bilans stanja koji prikazuje stanje sredstava i obaveza, kao i izvore sredstava krajem posljednjeg tromjesečja prije podnošenja plana finansijske reorganizacije (u daljem tekstu: "posljednji bilans stanja"),
 - 2) predračunski bilans stanja, koji prikazuje stanje sredstava i obaveza, izrađen uz pretpostavku da bi na dan podnošenja plana finansijske reorganizacije, predloženo prinudno poravnanje počelo da proizvodi dejstvo,
 - 3) iskaz uspjeha i finansijskih tokova za posljednju poslovnu godinu i za tekuću godinu do datuma posljednjeg bilansa stanja,
 - 4) predračunski iskazi finansijskih i novčanih tokova za razdoblje na koje se prinudno poravnanje odnosi, i to od početka do isteka roka za isplatu svih potraživanja po osnovu prinudnog poravnanja,
 - 5) u slučaju iz stava 1, tačka 4 ovog člana, pismenu izjavu povjerioca da pristaje na nepovoljnije uslove za naplatu svog potraživanja,
 - 6) u slučaju iz stava 2 ovog člana, pismenu izjavu povjerioca da pristaje na ispunjenje obaveze na drugi način,
 - 7) izveštaj vještaka o procjeni imovine koja je predmet ispunjenja obaveze umjesto novčanog ispunjenja, kada u slučaju iz stava 2 ovog člana visina potraživanja prelazi iznos od 100.000 KM,
 - 8) u slučaju iz člana 146 stav 4, pismenu izjavu razlučnog povjerioca da pristaje na manje povoljne uslove isplate i da se odriče preostalog potraživanja.
- (5) U planu za finansijsku reorganizaciju, dužnik mora učiniti vjerovatnim da će ispuniti obaveze iz predloženog prinudnog poravnanja, a može predložiti i dodatne metode finansijske reorganizacije, koje garantuje ispunjenje obaveza iz predloženog prinudnog poravnanja.

Član 146

- (1) U planu za finansijsku reorganizaciju, dužnik može ponuditi povjeriocima isplatu samo u novcu, osim ako se određeni povjerilac izričito i u pismenoj formi saglasi sa drugačijom isplatom.
- (2) Dužnik ne može povjeriocima ponuditi niži procenat isplate potraživanja od:
- 1) 20% ako se plaćanje nudi u roku od jedne (1) godine,
 - 2) 40% ako se plaćanje nudi u roku od dvije (2) godine,
 - 3) 60% ako se plaćanje nudi u roku od tri (3) godine,
 - 4) 80% ako se plaćanje nudi u roku od četiri (4) godine,
 - 5) 100% ako se plaćanje nudi u roku od pet (5) godina.
- (3) Pored sniženja isplate potraživanja po osnovu glavnice i dospjelih kamata do otvaranja postupka prinudnog poravnanja u obimu i rokovima iz prethodnog stava, dužnik može ponuditi i isplatu umanjene kamate za vrijeme od otvaranja postupka prinudnog poravnanja do isplate potraživanja.
- (4) Isplate na način predviđen u stavu 2 i 3 ovog člana, ne mogu biti ponuđene povjeriocima iz člana 162 stav 2 ovog zakona, osim ako su oni saglasni sa tim.

Član 147

Plan finansijske reorganizacije iz člana 145, stav 5 ovog zakona, podrazumijeva poslovni ili finansijski metod ili kombinaciju tih metoda, koji garantuju da će dužnik biti sposoban za plaćanje. Dužnik mora obrazložiti metode finansijske reorganizacije u svom planu, a posebno:

- 1) procijeniti i objasniti mjere za sticanje sredstava za plaćanje (kao što je prodaja dijela imovine, zajmovi i slično),
- 2) procijeniti i objasniti mjere koje se odnose na osnovni kapital (povećanje osnovnog kapitala dužnika pretvaranjem potraživanja povjerilaca koji se sa tim saglase, u dionice ili udjele)
- 3) opisati i procijeniti mjere za racionalizaciju poslovanja (smanjenje radne snage, smanjenje troškova i slično)
- 4) opisati i procijeniti načine na koji će dužnik povećati prihod (proizvodnja novog proizvoda sa analizom tržišta i slično)

Član 148

Ako dužnik kao jedan od metoda u planu finansijske reorganizacije, predloži povećanje osnovnog kapitala pretvaranjem potraživanja povjerioca u dionice ili udjele, na povećanje osnovnog kapitala primenjuju se odredbe Zakona o preduzećima, ako ovim zakonom nije drugačije određeno.

Član 149

Odluka o promjeni osnovnog kapitala mora sadržati:

- 1) nominalnu visinu za koji se osnovni kapital povećava i druge podatke koje odluka o povećanju kapitala sadrži,
- 2) novu visinu osnovnog kapitala,
- 3) broj dionica koje se izdaju zbog povećanja osnovnog kapitala i nominalni iznosi na koji glase određene dionice,
- 4) isključenje prečeg prava kupovine novih dionica ili udjela u korist postojećih dioničara ili vlasnika,
- 5) listu povjerilaca i visinu njihovih potraživanja prema dužniku, koja se pretvaraju u osnovni kapital dužnika,
- 6) ukupni nominalni iznos dionica koje se obezbjeđuju svakom povjeriocu,
- 7) navod da odluka o promjeni osnovnoga kapitala proizvodi dejstvo pod uslovom da se predloženo prinudno poravnanje odobri.

Član 150

- (1) Rok za upisivanje novih dionica ili sticanje udjela zbog povećanja osnovnog kapitala dužnika, mora biti određen tako da ističe najkasnije posljednjeg radnog dana prije dana određenog za ročište za prinudno poravnanje.
- (2) Izjava o upisu novih dionica ili sticanje udjela (upisna potvrda) mora pored podataka određenih zakonom, sadržati izjavu povjerioca da svoje potraživanje pretvara u osnovni kapital dužnika, pod uslovom da se prinudno poravnanje odobri.
- (3) Povjerilac mora priložiti sudu kopiju upisne potvrde iz stava 2 ovog člana, najkasnije prije glasanja o prinudnom poravnanju.

Član 151

- (1) Na dan pravosnažnosti rješenja o odobrenom prinudnom poravnanju, smatra se da su nove dionice ili udjeli uplaćeni i osnovni kapital dužnika promijenjen.
- (2) Uprava dužnika je dužna prijaviti upis promjene osnovnog kapitala u sudski registar u roku od petnaest (15) dana od dana pravosnažnosti rješenja o odobrenju prinudnog poravnanja.
- (3) Prijavu iz stava 2 ovog člana, može izvršiti i povjerilac koji je upisao dionice na način iz člana 150 ovog zakona, ako prijavu nije izvršila uprava dužnika u roku iz stava 2 ovog člana.
- (4) Uz prijavu za upis promjene osnovnog kapitala iz stava 2 ovog člana, potrebno je priložiti:
 - 1) posljednji bilans stanja dužnika,
 - 2) ovjeren zapisnik skupštine koja je donijela odluku o promjeni osnovnog kapitala iz člana 149 ovog zakona,
 - 3) potvrdu o upisu novih dionica ili sticanju udjela,
 - 4) kopiju rješenja o odobrenom prinudnom poravnanju sa potvrdom pravosnažnosti.

Član 152

- (1) Ako je plan finansijske reorganizacije u suprotnosti sa članom 145 i 146 ovog zakona, sudija poravnanja će pozvati dužnika da ispravi prijedlog u roku ne kraćem od osam (8) dana.
- (2) Ako dužnik ne postupi na način i u roku iz prethodnog stava, sudija poravnanja će odbiti prijedlog za prinudno poravnanje i obustaviti postupak.

Član 153

- (1) Ukoliko je predviđeno smanjenje broja lica zaposlenih kod dužnika kao jedna od mjera isplate duga, zatražiće se od dužnika da predloži program viška radne snage u skladu sa Zakonom o radnim odnosima. Ovaj program mora da sadrži: broj zaposlenika koji su višak, kao i radna mjesta koja se ukidaju.
- (2) U slučajevima iz stava 1 ovog člana, kada rješenje o odobrenju prinudnog poravnanja postane pravosnažno, dužnik ima pravo da odluči o prestanku radnog odnosa za najviše onaj broj zaposlenika koji je utvrđen programom i koji obavljaju poslove označene kao višak u programu. Radni odnos tog broja zaposlenika prestaje nakon isteka otkaznog roka koji ne može biti duži od trideset (30) dana.
- (3) Pri odlučivanju kojim zaposlenicima prestaje radni odnos na osnovu stava 2 ovog člana, sljedeći kriterijumi će se uzeti u obzir: profesionalna obučenost ili kvalifikacija i potrebno dodatno znanje i sposobnosti, radno iskustvo, uspjeh na radu i radni staž.
- (4) Zaposlenici čiji radni odnos prestaje na osnovu stava 2 ovog člana, imaće ista prava kao i zaposlenici čiji radni odnos prestaje usljed otvaranja stečajnog postupka.

Član 154

Sudije poravnanja pozivaju sve povjerioce na ročište za prinudno poravnanje oglasom koji se objavljuje u “Službenom glasniku Brčko Distrikta Bosne i Hercegovine” i u “Službenom glasniku Bosne i Hercegovine”, najkasnije petnaest (15) dana prije ročišta i koji se postavlja na oglasnu tablu suda.

Ročište o prinudnom poravnanju

Član 155

- (1) Na ročištu za prinudno poravnanje dužnik će iznijeti svoju ekonomsku i finansijsku situaciju i plan finansijske reorganizacije.
- (2) Uprava dužnika i lice odgovorno za finansijsko poslovanje dužnika, dužni su da daju izjavu, da sve informacije o ekonomskom i finansijskom položaju dužnika, priložene uz prijedlog za pokretanje postupka prinudnog poravnanja, odgovaraju stvarnom stanju.
- (3) Predsjednik odbora povjerilaca i upravnik poravnanja, nakon izjave iz prethodnog stava, izjašnjavaju se o planu finansijske reorganizacije.
- (4) Sudija poravnanja je dužan da obavijesti povjerioce koja potraživanja smatra utvrđenim u skladu sa članom 142 ovog zakona i koja potraživanja smatra vjerovatnim, djelimično ili u potpunosti.

Član 156

- (1) Povjerioci odlučuju o ponuđenom poravnanju glasanjem.
- (2) Povjerioci mogu glasati pismenim putem. Ako je povjerilac pravno lice, uz izjavu o glasanju, mora dostaviti dokaz da je ovlašćeno lice potpisalo izjavu o glasanju.
- (3) Pravo glasa pripada onim povjeriocima čija su potraživanja utvrđena u skladu sa članom 142 stav 3 ovog zakona, i povjeriocima čija su potraživanja osporena u skladu sa članom 142 stav 1 ili 2 ovog zakona, a sudija poravnanja ih smatra vjerovatnim djelimično ili u potpunosti.
- (4) Solidarna i zajednička potraživanja, ukoliko su ih povjerioci prijavili pojedinačno, smatraju se jednim potraživanjem, a povjerioci određuju između sebe lice koje prijavljuje potraživanje kao svoje.
- (5) Ako povjerilac prijavi potraživanja koja pripadaju različitim klasama, glas povjerioca će se računati u svakoj klasi odvojeno.
- (6) Povjerioci koji ne prijave svoja potraživanja u roku određenom u članu 141 ovog zakona, ne mogu glasati.

Član 157

- (1) Pravo glasa ne pripada povjeriocima čija se potraživanja u slučaju stečaja namiruju iz diobne mase prije ostalih potraživanja (član 98 stav 2), izlučnim i razlučnim povjeriocima za dio potraživanja do visine vrijednosti stvari koje su predmet izlučnog i razlučnog prava, izuzev onih koji su stekli pravo na izdvojeno namirenje izvršenjem u roku od šezdeset (60) dana koja su prethodila donošenju rješenja o otvaranju postupka prinudnog poravnanja.
- (2) Bez obzira na odredbe iz prethodnog stava, oni razlučni povjerioci koji se u pismenoj izjavi odreknu od razlučnih prava, imaju pravo da glasaju. Ako je razlučno pravo nastalo uknjižbom hipoteke na nepokretnoj imovini u zemljišnu knjigu, pismena izjava o odricanju od razlučnog prava, mora biti podobna za upis u zemljišnu knjigu, povjerioci moraju izjavu o odricanju priložiti sudu prije početka glasanja.

Član 158

- (1) Prinudno poravnanje smatra se prihvaćenim, ako povjerioci čija potraživanja iznose više od 60% svih potraživanja povjerilaca sa pravom glasa, glasaju za usvajanje prinudnog poravnanja.
- (2) Prilikom glasanja, uzima se u obzir glavnica potraživanja zajedno sa zateznom ili ugovorenom kamatom obračunatom do dana otvaranja postupka prinudnog poravnanja.

Član 159

Ako se na ročištu za prinudno poravnanje ne postigne većina potrebna za usvajanje prinudnog poravnanja, sudija poravnanja će odbiti prijedlog za prinudno poravnanje i po službenoj dužnosti započeti stečajni postupak.

Odobrenje prinudnog poravnanja

Član 160

- (1) Sudija poravnanja rješenjem odobrava zaključeno prinudno poravnanje, pod sljedećim uslovom:
 - 1) ako je prinudno poravnanje usvojeno (član 158 ovog zakona)
 - 2) ako je u slučaju iz člana 130 stav 4 ovog zakona odbio prijedlog za obustavu postupka iz člana 129 ovog zakona.
- (2) Ako nisu ispunjeni uslovi iz prethodnog stava, sudija poravnanja će odbiti prijedlog za prinudno poravnanje i obustaviti postupak.

Član 161

- (1) Klasifikacija potraživanja i način isplate svake klase potraživanja, čini sastavni dio rješenja o odobrenom prinudnom poravnanju.

- (2) Rješenje o odobrenom prinudnom poravnanju sadrži naročito:
- 1) izričit navod da klasifikacija potraživanja i način isplate svake klase potraživanja, čini sastavni dio rješenja o odobrenom prinudnom poravnanju,
 - 2) sadržaj isprava o odricanju od razlučnog prava iz člana 156 stav 2 ovog zakona,
 - 3) spisak povjerilaca čija su potraživanja priznata i iznosi utvrđenih i umanjenih potraživanja koja se isplaćuju, kao i rok za isplatu,
 - 4) nazivi i imena lica koja su dala jemstvo, uz naznačenje njihove solidarne odgovornosti svim povjeriocima društva.
- (3) Zaključeno prinudno poravnanje ima pravno dejstvo i prema povjeriocima koji nisu učestvovali u postupku, kao i prema povjeriocima koji su učestvovali u postupku a čija su potraživanja sporena i naknadno potvrđena.
- (4) Pravosnažno rješenje o odobrenju prinudnog poravnanja postavlja se na oglasnoj tabli suda i objavljuje se u “Službenom glasniku Brčko Distrikta Bosne i Hercegovine” i u “Službenom glasniku Bosne i Hercegovine”.

Član 162

- (1) Odobreno prinudno poravnanje nema pravno dejstvo na potraživanja povjerilaca prema jamcima, solidarnim dužnicima i regresnim dužnicima.
- (2) Odobreno prinudno poravnanje nema pravno dejstvo na potraživanja povjerilaca iz stava 2 člana 98 ovog zakona, na potraživanja razlučnih povjerilaca, osim za potraživanja za koja je pravo odvojenog namirenja stečeno za posljednjih šezdeset (60) dana prije donošenja rješenja o otvaranju postupka prinudnog namirenja, kao i na potraživanja izlučnih povjerilaca.

Član 163

- (1) Rješenje o odobrenju prinudnog poravnanja ima snagu izvršne isprave za sve povjerioce čija su potraživanja utvrđena.
- (2) Ako dužnik ne ispuni svoju obavezu iz zaključenog prinudnog poravnanja, povjerilac ima pravo da u izvršnom postupku naplati umanjeno potraživanje ne samo od dužnika nego i neposredno od jemca koji je jemčio za dužnika (član 161 stav 2 tačka 4 ovog zakona).

Član 164

- (1) Ako je potraživanje povjerioca zasnovano na izvršnoj ispravi, utvrđeno potraživanje čini glavnica i obračunata kamata do dana ročišta za prinudno poravnanje, kao i troškovi parničnog i izvršnog postupka.
- (2) Ako je prinudnim poravnanjem određena isplata potraživanja u umanjenom iznosu, procenat za isplatu će se odrediti u odnosu na cjelokupan iznos utvrđenog potraživanja iz prethodnog stava.
- (3) Na potraživanja određena za isplatu u prinudnom poravnanju teče zakonska kamata od dana odobrenja prinudnog poravnanja do roka određenog za isplatu tih potraživanja.

Član 165

- (1) Na osnovu odobrenog prinudnog poravnanja dužnik se oslobađa obaveza da povjeriocu isplati iznos koji je veći od postotka prihvaćenog u prinudnom poravnanju, a rokovi plaćanja se odlažu, u skladu sa zaključenim prinudnim poravnanjem. U tom obimu dužnik se oslobađa obaveza prema licima kojima pripada pravo na regres (jemci).
- (2) Ako dužnik poslije zaključenog prinudnog poravnanja isplati povjericima iznos koji prelazi postotak prihvaćen u prinudnom poravnanju, nema pravo na povraćaj tog iznosa.

Član 166

- (1) Izvršne isprave koje se odnose na potraživanja utvrđena u rješenju o odobrenju prinudnog poravnanja gube pravnu snagu u odnosu na dužnika.
- (2) Izvršne isprave koje se odnose na potraživanja iz člana 161, stav 3 ovog zakona mogu se izvršiti prema dužniku prinudnog poravnanja samo pod uslovima iz zaključenog prinudnog poravnanja.
- (3) U postupku koji se poslije zaključenog prinudnog poravnanja vodi protiv dužnika radi naplate potraživanja iz člana 161, stav 3, sud će, kao i drugi nadležni organ, po službenoj dužnosti, ako utvrdi da postoji obaveza dužnika, rješenjem utvrditi njegovu obavezu i obavezati ga na plaćanje u skladu s uslovima iz zaključenog prinudnog poravnanja.

Član 167

Protiv rješenja o odobrenju prinudnog poravnanja, odnosno odbijanju prijedloga za zaključenje prinudnog poravnanja žalbu može podnijeti dužnik, povjerioci i druga lica koja u tome imaju pravni interes.

Izvršenje prinudnog poravnanja

Član 168

- (1) Ako dužnik ne izvrši u potpunosti obaveze iz prinudnog poravnanja, povjerioci koji su namireni u skladu sa prinudnim poravnanjem nisu dužni da vrate ono što su primili.
- (2) Potraživanja povjerilaca iz stava 1 ovog člana, će se smatrati izmirenim u potpunosti, ako su izmireni iznosi utvrđeni u prinudnom poravnanju.
- (3) Povjerioci koji su djelimično namireni u skladu s uslovima zaključenog prinudnog poravnanja, prijavljuju u stečajnom postupku ukupan iznos potraživanja umanjeno za procenat koji se smatra da je namiren u skladu sa prinudnim poravnanjem.

- (4) Povjerioci koji nisu ni djelimično namireni u skladu s uslovima zaključenog prinudnog poravnanja, prijavljuju u stečajnom postupku potraživanja u punom iznosu na koji bi imali pravo da nije zaključeno prinudno poravnanje.

Stavljanje van snage prinudnog poravnanja

Član 169

- (1) Svaki povjerilac koji je učestvovao u prinudnom poravnanju može u roku od šest (6) mjeseci po isteku roka za izvršenje prinudnog poravnanja, podnijeti zahtjev sudiji poravnanja da stavi van snage zaključeno prinudno poravnanje.
- (2) Zahtjev iz stava 1 ovog člana može se podnijeti ako dužnik može iz svojih sredstava izmiriti potraživanja povjerilaca u visini većoj od iznosa utvrđenog u prinudnom poravnanju, pod uslovom da se time ne umanja sposobnost dužnika da redovno ispunjava svoje obaveze prema povjeriocima.
- (3) U rješenju o stavljanju van snage zaključenog prinudnog poravnanja, sudija poravnanja će odrediti rok, koji ne može biti duži od jedne (1) godine, u kome je dužnik dužan da isplati povjeriocima neisplaćeni dio potraživanja.
- (4) Žalba protiv rješenja iz stava 3 ovog člana zadržava izvršenje rješenja.

Član 170

- (1) Svaki povjerilac čije je potraživanje smanjeno zbog zaključenog prinudnog poravnanja može u roku od dvije (2) godine od dana pravosnažnosti rješenja kojim je odobreno prinudno poravnanje, tužbom tražiti da se prinudno poravnanje stavi van snage ako je zaključeno na prevaran način.
- (2) Odluka o stavljanju van snage zaključenog prinudnog poravnanja nema pravnog dejstva na obaveze po preuzetom jamstvu.

Upis u sudski registar

Član 171

- (1) Prijedlog za pokretanje postupka prinudnog poravnanja, rješenje o otvaranju postupka prinudnog poravnanja, rješenje o obustavi postupka prinudnog poravnanja, rješenje o odbijanju prijedloga za prinudno poravnanje i rješenje o odobrenju prinudnog poravnanja upisuju se po službenoj dužnosti u registar.
- (2) Upisom u registar, sud istovremeno upisuje brisanje prethodnog upisa.

Troškovi prinudnog poravnanja

Član 172

- (1) Svaki učesnik u prinudnom poravnanju snosi svoje troškove.
- (2) Troškove iz člana 116 stav 3 i člana 117 stav 2 ovog zakona snosi dužnik.
- (3) Nezavisno od ishoda postupka, učesnik je dužan i drugim učesnicima nadoknaditi troškove koje im je prouzrokovao svojom krivicom.

Primjena propisa o stečaju

Član 173

- (1) Odredbe o stečajnom postupku iz ovog zakona shodno se primjenjuju i na postupak prinudnog poravnanja, ako ovim zakonom nije drugačije određeno.
- (2) Odredbe u stečajnom postupku koje se odnose na pravo pobijanja pravnih radnji stečajnog dužnika, ne primenjuju se u postupku prinudnog poravnanja.

VI - LIKVIDACIJA

Član 174

- (1) Zakonom se određuje ko predlaže pokretanje postupka likvidacije.
- (2) Ako zakonom nije određeno ko predlaže pokretanje postupka likvidacije pravnog lica, prijedlog podnosi lice ili organ koji je donio odluku o prestanku pravnog lica.
- (3) Ako pravno lice prestaje da postoji na osnovu sudske odluke, lice koje izvršava sudsku odluku podnosi prijedlog za pokretanje postupka likvidacije, ako zakonom nije drugačije određeno.

Član 175

Sud po službenoj dužnosti pokreće postupak likvidacije ako je pravosnažnom sudskom odlukom utvrđena ništavost upisa u sudski registar.

Član 176

Organi u postupku likvidacije su likvidacioni sudija i likvidacioni upravnik.

Član 177

- (1) Postupak likvidacije se ne sprovodi ako su ispunjeni uslovi za sprovođenje stečajnog postupka.
- (2) Ako se tokom postupka u bilo koje vrijeme, sve do zaključenja likvidacionog bilansa, utvrdi da su ispunjeni uslovi za pokretanje stečajnog postupka, likvidacioni upravnik je dužan bez odlaganja podnijeti prijedlog za pokretanje stečajnog postupka.
- (3) Stečajni postupak sprovodi likvidacioni sudija i likvidacioni upravnik, na način na koji postupak sprovodi stečajni sudija i stečajni upravnik, ako ovim zakonom nije drugačije određeno.
- (4) Radnje sprovedene u postupku likvidacije valjane su i u stečajnom postupku.

Član 178

Ako se postupak likvidacije sprovodi po službenoj dužnosti, sud će rješenjem naložiti pravnom licu da uplati odgovarajući novčani iznos za pokrivanje troškova koji će nastati pokretanjem postupka likvidacije.

Član 179

- (1) Odredbe ovog zakona koje se odnose na stečajni postupak shodno se primjenjuju i na postupak likvidacije, ako ovim zakonom nije drugačije određeno.
- (2) U postupku likvidacije se ne primjenjuju odredbe o prinudnom poravnanju prije i za vrijeme stečajnog postupka, o odboru povjerilaca, o razlučnim povjeriocima, o pobijanju pravnih radnji, o ročištu za glavnu diobu i prigovorima na odluku o odobravanju nacrtu glavne diobe, o prodaji dužnika kao pravnog lica i o odbacivanju prijave potraživanja koje su u sud prisjele nakon isteka roka za prijavljivanje.

Član 180

- (1) Potraživanja povjerilaca koja nisu prijavljena do datuma do kojeg je bilo moguće uzeti ih u razmatranje u nacrtu glavne diobe likvidacione mase, biće izmirena po okončanju postupka likvidacije, od strane lica u čiju je korist uplaćen ostatak imovine likvidacione mase poslije glavne diobe, i to samo do visine vrijednosti preuzete imovine.
- (2) Tužbu radi ostvarivanja prava iz stava 1 ovog člana povjerioci mogu podnijeti u roku od (1) jedne godine od dana objavljivanja oglasa o zaključenju postupka likvidacije u “Službenom glasniku Brčko Distrikta Bosne i Hercegovine” ili u “Službenom glasniku Bosne i Hercegovine”.

VII - SUKOB ZAKONA I NADLEŽNOSTI

Član 181

- (1) Sud je isključivo nadležan za sprovođenje postupka stečaja, prinudnog poravnanja i likvidacije protiv dužnika koji ima sjedište na teritoriji Distrikta.
- (2) Rješenja suda donesena u postupcima iz stava 1 ovog člana se odnose na cjelokupnu imovinu dužnika koja se nalazi u Bosni i Hercegovini i inostranstvu.

Član 182

- (1) Pravni propisi države u kojoj je pokrenut stečajni postupak, primjenjuju se i za unovčavanje imovine stečajnog dužnika.
- (2) Pravni propisi država na kojima su zasnovana potraživanja povjerilaca, primjenjuju se i na diobu imovine stečajnog dužnika.

Član 183

- (1) Odluke stranih sudova donesene u postupku stečaja, prinudnog poravnanja ili likvidacije protiv dužnika koji ima prijavljeno sjedište ili prebivalište na području stranog suda, priznaju se u Distriktu pod uslovima predviđenim za priznanje stranih sudskih odluka u skladu sa zakonom.
- (2) Rješenje o priznanju odluke stranog suda iz stava 1 ovog člana se objavljuje u “Službenom glasniku Brčko Distrikta Bosne i Hercegovine” i “Službenom glasniku Bosne i Hercegovine” na način predviđen u ovom zakonu za objavljivanje rješenja o pokretanju stečajnog ili postupka prinudnog poravnanja.

Član 184

- (1) U slučaju priznavanja odluke stranog suda, odredbe ovog zakona će se shodno primjenjivati i na pravni položaj stranog dužnika, kao i stranog stečajnog upravnika.
- (2) U postupku za priznanje odluke stranog suda, neće se određivati novi stečajni upravnik i odbor povjerilaca u Distriktu.
- (3) Rokovi predviđeni zakonima i drugim propisima Distrikta počinju teći po objavljivanju odluke o priznanju.

Član 185

Strana sudska odluka priznata u smislu člana 183 ovog zakona, u pogledu imovine dužnika koja se nalazi u Distriktu, proizvodi pravno dejstvo koje predviđaju pravni propisi Distrikta za odluke odgovarajućeg sadržaja.

VIII - KAZNENE ODREDBE

Član 186

Novčanom kaznom od 200 do 2.000 KM kazniće se za prekršaj stečajni upravnik ako ne dovede u red evidenciju knjigovodstvenih podataka do dana otvaranja stečajnog postupka, ako ne odredi komisiju za popis imovine, ako ne sastavi početni stečajni bilans, ako ne obezbijedi ostvarivanje potraživanja dužnika, ako ne preduzima mjere da unovči imovinu dužnika, ili ako ne napravi nacrt glavne diobe ili prijedlog završnog stečajnog računa (član 18 stav 1).

Član 187

Novčanom kaznom od 200 do 2.000 KM kazniće se za prekršaj likvidacioni upravnik ako ne podnese prijedlog sudu za pokretanje stečajnog postupka kad su za to ispunjeni uslovi (član 177 stav 2).

Član 188

Novčanom kaznom od 300 do 5.000 KM kazniće se za prekršaj dužnik protiv kojeg je podnjet prijedlog za otvaranje stečajnog postupka, ako stečajnom sudiji ne stavi na raspolaganje potrebnu dokumentaciju, podatke i obavještenja (član 34 stav 1).

Član 189

Novčanom kaznom od 200 do 2.000 KM kazniće se za prekršaj vlasnik dužnika, direktor ili drugi radnik s posebnim ovlašćenjem dužnika koji ne pruži stečajnom sudiji potrebnu dokumentaciju i podatke koji su mu poznati bez obzira na to da li mu je prestala funkcija, odnosno radni odnos kod dužnika (stav člana 34 stav 2).

IX - PRELAZNE I ZAVRŠNE ODREDBE

Član 190

- (1) Postupak stečaja, prinudnog poravnanja ili likvidacije otpočet prije dana stupanja na snagu ovog zakona, ako je donesena odluka o otvaranju postupka stečaja, prinudnog poravnanja ili likvidacije, završiće se u skladu sa propisima koji su važili do dana stupanja na snagu ovog zakona.
- (2) Izuzetno od odredbe stava 1 ovog člana, prodaja dužnika može se izvršiti i u postupku koji je u toku.

Član 191

Pravosudna komisija će donijeti Pravilnik o kriterijumima za određivanje nagrade i isplati avansa stečajnom, likvidacionom i upravniku poravnanja u roku od tri (3) mjeseca od dana stupanja na snagu ovog zakona.

Član 192

Danom stupanja na snagu ovog zakona prestaje primjena propisa o stečaju, prinudnom poravnanju i likvidaciji koji su se primjenjivali u Distriktu do dana stupanja na snagu ovog zakona.

Član 193

Ovaj zakon stupa na snagu osmog dana od dana objavljivanja u "Službenom glasniku Brčko Distrikta Bosne i Hercegovine".

Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТ

Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKT

Broj:0-02-022-469 /01
Brčko, 11. i 14. decembra 2001. godine

PREDSJEDNIK
SKUPŠTINE BRČKO DISTRIKTA

Mirsad Đapo, dipl. pravnik

This document was created with Win2PDF available at <http://www.daneprairie.com>.
The unregistered version of Win2PDF is for evaluation or non-commercial use only.